

四庫全書

史部

欽定四庫全書

史部
通志卷十六

詳校官侍讀_臣陳萬青

編修_臣裴謙覆勘

覆校官助教_臣金學詩

校對官典簿_臣劉光第

謄錄監生_臣陸鼎

欽定四庫全書

通志卷十六

宋 右廸功郎鄭樵 漁仲撰

北齊紀第十六

神武帝 文襄帝 文宣帝 濟南王 孝昭帝

武成帝 後主 幼主

高祖神武皇帝姓高氏諱歡字賀六渾勃海脩人也齊大夫高氏之後漢永平中有高洪為勃海太守因家焉

六世祖隱晉元菟太守隱生慶慶生泰泰生湖三世仕
慕容氏及慕容寶敗國亂湖率衆歸魏為右將軍湖生
四子第三子謚仕魏位至治書侍御史坐法徙居懷朔
鎮謚生皇考樹樹性通率不事家業住居白道南數有
赤光紫氣之異隣人以為怪勸徙居以避之皇考曰安
知非吉居之自若及神武生而皇妣韓氏殂養於同產
姊壻鎮獄尉景家神武既累世北邊故習其俗遂同
鮮卑長而深沈有大度輕財重士為豪俠所宗目有精

光長頭高權齒白如玉少有人傑表家貧及聘武明皇
后始有馬得給鎮為隊主鎮將遼西段長常竒神武貌
謂曰君有康濟才終不徒然便以子孫為託及貴追贈
長司空擢其子寧而用之神武自隊主轉為函使嘗乘
驛過建興雲霧晝晦雷聲隨之半日乃絕若有神應者
每行道路往來無風塵之色又嘗夢履衆星而行覺而
內喜為函使六年每至洛陽給令史麻祥使祥嘗以肉
啗神武神武性不立食坐而進之祥以為慢已答神武

四十及自洛陽還傾產以結客親故怪問之答曰吾至洛陽宿衛羽林相率焚領軍張彝宅朝廷懼其亂而不問為政若此事可知矣財物豈可常守邪自是乃有澄清天下之志與懷朔省事雲中司馬子如及秀容人劉貴中山人賈顯智為奔走之友懷朔戶曹史孫騰外兵史侯景亦相友結劉貴嘗得一白鷹與神武及尉景蔡雋子如賈顯智等獵於沃野見一赤兔每搏輒逸遂至迥澤澤中有茅屋將奔入有狗自屋中出噬之鷹兔俱

死神武怒以鳴鏑射之狗斃屋中乃有二人出持神武襟甚急其母兩目盲曳杖呵其二子曰何故觸大家出甕中酒烹羊以待客因自言善暗相徧捫諸人語顯智云君後當至卿佐要不以善終語子如劉貴云並至台相次及神武曰諸君榮貴皆由此人食畢而去行數里還更訪之則本無人居乃知向非人也由是諸人益加敬異孝昌元年柔元鎮人杜洛周反於上谷神武乃與同志從之醜其行事私與尉景段榮蔡雋圖之不果而

逃為其騎所追文襄及魏永熙后皆幼武明后於牛上
抱負之文襄屢落牛神武彎弓將射之以決去后呼榮
求救賴榮透下取之以免遂奔葛榮又亡歸爾朱榮於
秀容先是劉貴事榮盛言神武美至是始得見以憔悴
故未之奇也貴乃為神武更衣復求見焉因隨榮之廐
廐有惡馬榮命翦之神武乃不加羈絆而翦竟不蹄齧
已而起曰御惡人亦如此馬矣榮遂坐神武於牀下屏
左右而訪時事神武曰聞公有馬十二谷色別為羣將

此竟何用也榮曰但言爾意神武曰方今天子愚弱太
后淫亂孽寵擅用朝政不行以明公雄武乘時奮發討
鄭儼徐紇而清帝側霸業可舉鞭而成此賀六渾之意
也榮大悅語自日中至夜半乃出自是每參軍謀後從
榮徙據并州抵揚州邑人龐蒼鷹止團焦中每從外歸
主人遙聞行響動地蒼鷹毋數見團焦上赤氣赫然屬
天又蒼鷹嘗夜欲入有青衣人拔刀叱曰何故觸王言
訖不見始以為異密覘之惟見赤蛇蟠牀上乃益驚異

因殺牛分肉厚以相奉蒼鷹母求以神武為義子及得志以其宅為第號為南宅雖門巷開廣堂宇崇麗其本所住團焦以石堊塗之留而不毀至文宣時遂為宮既而榮以神武為親信都督于時魏明帝銜鄭儼徐紇逼靈太后未敢制私使榮舉兵內向榮以神武為前鋒至上黨明帝又私詔停之及帝暴崩榮遂入洛因將篡位神武諫恐不聽請鑄像卜之鑄不成乃止孝莊帝立以定策勲封銅鞮伯及爾朱榮擊葛榮令神武喻下賊別

稱王者七人後與行臺于暉破羊侃于太山尋與元天
穆破邢杲于濟南累遷第三鎮人酋長嘗在榮帳內榮
嘗問左右曰一日無我誰可主軍皆稱爾朱兆曰此正
可統三千騎以還堪代我主衆者唯賀六渾耳因誡兆
曰爾非其匹終當為此子穿鼻乃以神武為晉州刺史
於是大聚斂因劉貴貨榮下要人盡得其意時州庫角
無故自鳴神武異之無幾而孝莊誅榮及爾朱兆自晉
陽將舉兵赴洛召神武神武使長史孫騰辭以絳蜀汾

胡欲反不可委去兆恨焉騰復命神武曰兆舉兵犯上此大賊也吾不能久事之自是始有圖兆計及兆入洛執莊帝以北神武聞之大驚又使孫騰偽賀兆因密覘孝莊所在將劫以舉義不果乃以書喻之言不宜執天子以受惡名於海內兆不納弒帝而與爾朱世隆等立長廣王暉改元建明封神武為平陽郡公及費也頭紇豆陵步藩入秀容逼晉陽兆徵神武神武將往賀拔焉過兒請緩行以敝之神武乃往往逗留辭以河無橋不

得渡步藩軍盛兆敗走初孝莊之誅爾朱榮知其黨必有逆謀乃密勅步藩令襲其後步藩既敗兆等遂兵勢日盛兆又請救於神武神武內圖兆復慮步藩後日難除乃與兆悉力破之藩死兆深德神武誓為兄弟時世隆度律彥伯共執朝政天光據關右兆據并州仲遠據東郡各擁兵為暴天下苦之葛榮衆流入并肆者二十餘萬為契丹陵暴皆不聊生大小二十六反誅夷者半猶草竊不止兆患之問計於神武神武曰六鎮反殘不

可盡殺宜選王素腹心者私使統馬若有犯者罪其帥則所罪者寡兆曰善誰可行也賀拔允時在坐請神武神武拳毆之折其一齒曰生平天柱時奴輩伏處分如鷹犬今日天下安置在王而阿鞠泥敢誣下罔上請殺之兆以神武為誠遂以委焉神武以兆醉恐醒後或致疑貳遂出宣言受委統州鎮兵可集汾東受令乃建牙楊曲川陳部分有款軍門者絳巾袍自稱梗楊驛子願廁左右訪之則以力聞嘗於并州市搭殺人者乃署為

親信都督兵士素惡兆而樂神武於是莫不皆至居無
何又使劉貴請兆以并肆頻歲霜旱降戶掘黃鼠而食
之皆面無穀色徒汚人國土請令就食山東待溫飽而
處分之兆從其議其長史慕容紹宗諫曰不可今四方
擾擾人懷異望况高公雄略又握大兵將為不利兆曰
香火重誓何所慮邪紹宗曰親兄弟尚難信何論香火
時兆左右已受神武金因譖紹宗與神武舊隙兆乃禁
紹宗而催神武發神武乃自晉陽出滏口路逢爾朱榮

妻北鄉郡長公主自洛陽來有馬三百疋盡奪易之兆聞乃釋紹宗而問焉紹宗曰今猶掌握中物也兆於是自追神武至襄垣會漳水暴長橋壞神武隔水拜曰所以偕公主馬非有他故備山東盜耳王受公主言自來賜追今渡河而死不辭但恐此衆便叛兆自陳無此意因輕馬浮渡與神武坐幕下陳謝遂授刀引頭使神武斫已神武大哭曰自天柱薨背賀六渾更何所仰願大家千萬歲以申力用今旁人構間至此大家何忍復出

此兆投刀於地遂刑白馬而盟誓為兄弟留宿夜飲尉
景伏壯士欲執兆神武齧臂止之曰今殺之其黨必奔
歸聚結兵飢馬瘦不可相支若英雄崛起則為害滋甚
不如且置之兆雖勁捷而兇狡無謀不足圖也旦日兆
歸營又召神武神武將上馬詣之孫騰牽衣乃止兆隔
水肆罵馳還晉陽兆心腹念賢領降戶家累別為營神
武偽與之善觀其佩刀因取以殺之其從者盡散於是
士衆咸悅俱願附從初魏太平真君中內學者奏言上

黨有天子氣云在壺關大王山太武帝於是南巡以厭
當之累石為三封斬其北鳳皇山以毀其形後上黨人
居晉陽號上黨坊神武實居之及是行舍大王山六旬
而進將出滏口倍加約束纖毫之物不聽侵犯將過麥
地神武輒步牽馬遠近聞之皆稱高儀同將兵整肅益
歸心焉遂前行屯鄴北求糧於相州刺史劉誕誕不供
有軍營租米神武自取之

魏普泰元年二月神武軍次信都高乾封隆之開門以

待遂據冀州是月爾朱度律廢元暄而立節閔帝欲羈縻神武三月乃白節閔帝封神武為渤海王徵使入覲神武辭四月癸巳又加授東道大行臺第一鎮人酋長龐蒼鷹自太原來奔神武以為行臺郎尋以為安州刺史神武自向山東養士繕甲禁兵侵掠百姓歸心乃詐為書言爾朱兆將以六鎮人配契胡為部曲衆皆愁又為并州符徵兵討步落稽發萬人將遣之孫騰尉景偽請留五日如此者再神武親送之郊雪涕執別人號慟

哭聲動地神武乃喻之曰與爾俱失鄉客義同一家不
意在上乃爾徵召直向西已當死後軍期又當死配國
人又當死柰何衆曰唯有反耳神武曰反是急計須推
一人為主衆願奉神武神武曰爾鄉里難制不見葛榮
乎雖百萬衆無刑法終自灰滅今以吾為主當與前異
不得欺漢兒不得犯軍令生死任吾則可不爾不能為
取笑天下衆皆頓顙曰死生唯命神武陽若不得已明
日椎牛饗士喻以討爾朱兆之意封隆之進曰千載一

時普天幸甚神武曰討賊大順也拯時大業也吾雖不
武以死繼之何敢讓焉六月庚子建義於信都尚未顯
背爾朱氏及李元忠與高乾平殷州斬爾朱羽生首來
謁神武撫膺曰今日反決矣乃以元忠為殷州刺史是
時兵威既振乃抗表罪狀爾朱氏世隆等秘表不通八
月爾朱兆攻陷殷州李元忠來奔孫騰以為朝廷隔絕
不權立天子則衆望無所繫十月壬寅奉章武王融子
勃海太守朗為皇帝年號中興是為廢帝時度律仲遠

軍次晉陽爾朱兆會之神武用竇泰策縱反間度律仲遠不戰而還神武乃敗兆於廣阿十一月攻鄴相州刺史劉誕嬰城固守神武起土山為地道往建大柱一時焚之城陷入地麻祥時為湯陰令神武呼之曰麻都祥慙而逃

永熙元年正月壬午拔鄴城據之廢帝進神武大丞相柱國大將軍太師是時青州建義大都督崔靈珍大都督耿翔皆遣使歸附行汾州事劉貴棄城來降閏三月

爾朱天光自長安兆自并州度律自洛陽仲遠自東郡
同會鄴衆號二十萬夾洹水而軍節閔以長孫承業為
大行臺總督馬神武令封隆之守鄴自出頓紫陌時馬
不滿二千步兵不至三萬衆寡不敵乃於韓陵為圓陣
連牛驢以塞歸道於是將士皆為死志四面赴擊之爾
朱兆責神武以背已神武曰本戮力者共輔王室今帝
何在兆曰永安枉害天柱我報讐耳神武曰我昔日親
聞天柱計汝在戶前立豈得言不反邪且以君殺臣何

報之有今日義絕矣乃合戰大敗之爾朱兆對慕容紹宗叩心曰不用公言至此將輕走紹宗反旗鳴角收聚散卒成軍容而西上高季式以七騎追奔度野馬崗與兆遇高昂望之不見哭曰喪吾弟矣夜久季式還血滿袖斛斯椿倍道先據河橋初普泰元年十月歲星熒惑鎮星太白聚於觜參色甚明太史占云當有王者興是時神武起於信都至是而破兆等四月斛斯椿執天光度律以送洛陽長孫承業遣都督賈顯智張歡入洛陽

執世隆彥伯斬之兆奔并州仲遠奔梁州遂死焉時凶
蠹既除朝廷慶悅初未戰之前月章武人張紹夜中忽
被數騎將踰城至一大將軍前勅紹為軍導向鄴云佐
受命者除殘賊紹回視之兵不可測整疾無聲將至鄴
乃放馬及戰之日爾朱氏軍人見陣外士馬四合蓋神
助也既而神武至洛陽廢節閔及中興主而立孝武帝
孝武既即位授神武大丞相天柱大將軍太師世襲定
州刺史增封并前十五萬戶神武辭天柱減戶五萬千

辰還鄴魏帝餞於乾脯山執手而別七月壬寅神武帥師北伐爾朱兆封隆之言侍中斛斯椿賀拔勝賈顯智等往事爾朱普皆反噬今在京師寵任必構禍隙神武深以為然乃歸天光度律於京師斬之遂自滏口入爾朱兆大掠晉陽北保秀容并州平神武以晉陽四塞乃建大丞相府而定居焉爾朱兆既至秀容分兵守險出入寇抄神武揚聲討之師出止者數四兆意怠神武揣其歲首當宴會遣竇泰以精騎馳之一日一夜行三百

里神武以大軍繼之

二年正月竇泰奄至爾朱兆庭軍人因宴休惰忽見泰軍驚走追破之於赤洪嶺兆自縊神武親臨厚葬之慕容紹宗以爾朱榮妻子及餘衆自保焉突城降神武以義故待之甚厚神武之入洛也爾朱仲遠部下都督橋寧張子期自滑臺歸命神武以其助亂且數反覆皆斬之斛斯椿由是內不自安乃與南陽王寶炬及武衛將軍元毗魏光祿王思政構神武於魏帝舍人元士弼又

奏神武受勅大不敬故魏帝心貳於賀拔岳初孝明之時洛下以兩拔相擊謠言銅拔打鐵拔元家世將末好事者以二拔謂拓拔賀拔言俱將衰敗之兆時司空高乾密啓神武言魏帝之貳神武封呈魏帝殺之又遣東徐州刺史潘紹業密勅長樂太守龐蒼鷹令殺其弟昂昂先聞其兄死以稍刺柱伏壯士執紹業於路得勅書於袍領遂來奔神武抱其首哭曰天子枉害司空遽使以白虎幡勞其家屬時乾次第愼在光州為政嚴猛又

縱部下取納魏帝使代之慎聞難將奔梁其屬曰公家
勲重必不兄弟相及乃弊衣推鹿車歸勃海逢使者亦
來奔於是魏帝與神武隙矣阿至羅虜正光以前常稱
藩自魏朝多事皆叛神武遣使招納便欸附先是詔以
寇賊平罷行臺至是以殊俗歸降復授神武大行臺隨
機處分神武賚其粟帛議者以為徒費無益神武不從
撫慰如初其酋帥吐陳等感恩皆從指麾救曹泥取万
俟受洛干大收其用河西費也頭虜紇豆陵伊利居苦

池河恃險擁衆神武遣長史侯景屢招不從

天平元年正月壬辰神武西伐費也頭虜紇豆陵伊利於河西滅之遷其部落於河東二月永寧寺九層浮屠災既而人有從東萊至云及海上人咸見之於海中俄而霧起乃滅說者以為天意若曰永寧見災魏不寧矣飛入東海勃海應矣魏帝既有異圖時侍中封隆之與孫騰私言隆之喪妻魏帝欲妻以從妹騰亦未之信心害隆之泄其言於斛斯椿椿以白魏帝又孫騰帶仗入

省擅殺御史並亡來奔稱魏帝搢舍人梁續於前光祿少卿元子幹攘臂擊之謂騰曰語爾高王元家兒拳正如此領軍婁昭辭疾歸晉陽魏帝於是以斛斯椿兼領軍分置督將及河南關西諸刺史華山王鷟在徐州神武使邸珍奪其管籥建州刺史韓賢濟州刺史蔡儁皆神武同義魏帝忌之故省建州以去賢使御史中尉綦儁察儁罪以開府賈顯智為濟州儁拒之魏帝愈怒五月下詔云將征句吳發河南諸州兵增宿衛守河橋六

月丁巳密詔神武曰宇文黑獺自平破秦隴多求非分
脫有變非常事資經略但表啓未全背戾進討事涉忽
忽遂召羣臣議其可否僉言假稱南伐內外戒嚴一則
防黑獺不虞二則可威吳楚時魏帝將伐神武神武部
署將帥帝慮疑故有此詔神武乃表曰荊州綰接蠻右
密邇畿服關隴恃遠將有逆圖臣今潛勒兵馬三萬擬
從河東而渡又遣桓州刺史庫狄干瀛州刺史郭瓊汾
州刺史斛律金前武衛大將軍彭樂擬兵四萬從其來

遼津渡遣領軍將軍婁昭相州刺史竇泰前瀛州刺史
堯雄并州刺史高隆之擬兵五萬以討荊州遣冀州刺
史尉景前冀州刺史高敖曹濟州刺史蔡儁前侍中封
隆之擬山東兵七萬突騎五萬以征江左皆約勒所部
伏聽處分魏帝知覺其變乃出神武表命羣臣議之欲
止神武諸軍神武乃集在并僚佐令其博議還以表聞
仍以信誓自明忠款曰臣為嬖佞所間陛下一旦賜疑
使幽枉之情無所自明臣若不盡誠竭節敢負陛下則

使身受天殃子孫殄絕陛下若垂信赤心使干戈不動
佞臣一二人願斟量廢出辛未帝復錄在京文武議意
以答神武使舍人溫子昇草勅子昇遂巡未敢作帝據
胡牀拔劍作色子昇乃為勅曰前持心血遠以示王深
冀彼此共相體悉而不良之徒坐生間貳近孫騰倉卒
向彼致使聞者疑有異謀故遣御史中尉綦儁具申朕
懷今得王啓言誓懇惻反覆思之猶所未解以朕眇身
遇王武略不勞尺刃坐為天子所謂生我者父母貴我

者高王今若無事背王規相攻討則使身及子孫還如
王誓皇天后土實聞此言近慮宇文為亂賀拔勝應之
故纂嚴欲與王俱為聲援宇文今日使者相望觀其所
為更無異迹賀拔在南開拓邊境為國立功念無可責
君若欲分討何以為辭東南不賓為日已久先朝已來
置之度外今天下戶口減半未宜窮兵極武朕既闇昧
不知佞人是誰可列其姓名令朕知也如聞庫狄干語
王云本欲取懦弱者為主無事立此長君使其不可駕

御今但作十五日行自可廢之更立餘者如此議論自是王間勲人豈出佞臣之口去歲封隆之背叛今年孫騰逃走不罪不送誰不怪王騰既為禍始曾無愧懼王若事君盡誠何不斬送二首王雖啓圖西去而四道俱進或欲南度洛陽或欲東臨江左言之者猶應自怪聞之者寧能不疑王若守誠不貳晏然居北在此雖有百萬之衆終無圖彼之心王脫信邪棄義舉旗南指縱無匹馬隻輪猶欲奮空拳而爭死朕本寡德王已立之百

姓無知或謂實可若為他所圖則彰朕之惡假令還為
王殺幽辱齏粉了無遺恨何者王既以德見推以義見
舉一朝背德舍義便是過有所歸本望君臣一體若合
符契不圖今日分疏到此古語云越人射我笑而道之
吾兄射我泣而道之朕既親王情如兄弟所以投筆拊
膺不覺歔歔初神武自京師將北以為洛陽久經喪亂
王氣衰盡雖有山河之固土地褊狹不如鄴請遷都魏
帝曰高祖定鼎河洛為永永之基經營制度至世宗乃

畢王既功在社稷宜遵太和舊事神武奉詔至是復謀
焉遣三千騎鎮建興益河東及濟州兵於白溝禁船不
聽向洛諸州和糴粟運入鄴城魏帝又勅神武曰王若
厭伏人情杜絕物議唯有歸河東之兵罷建興之戍送
相州之粟追濟州之軍令蔡儁受代使邱珍出徐止戈
散馬各事家業脫須糧廩別遣轉輸則讒人結舌疑悔
不生王高枕太原朕垂拱京洛終不舉足渡河以干戈
相詣王若馬首南向問鼎輕重朕雖無武欲止不能必

為社稷宗廟出萬死之策決在於王非朕能定為山止
實相為惜之魏帝時以任祥為兼尚書左僕射加開府
祥棄官走至河北據郡待神武魏帝乃勅文武官北來
者任去留下詔罪狀神武為北伐經營神武亦勒馬先
告曰孤遇爾朱擅權舉大義於四海奉戴主上義貫幽
明橫為斛斯椿讒構以誠節為逆首昔趙鞅興晉陽之
甲誅君側惡人今者南邁誅椿而已以高昂為前鋒曰
若用司空言豈有今日之舉司馬子如答神武曰本欲

立小者正為此耳魏帝徵兵關右名賀拔勝赴行在所遣大行臺長孫承業大都督潁川王斌之斛斯椿共鎮虎牢汝陽王暹鎮石濟行臺長孫子彥帥前恒農太守元洪略鎮陝賈顯智率豫州刺史斛斯元壽伐蔡儁神武使竇泰與左廂大都督莫多婁貸文逆顯智韓賢逆暹元壽軍降泰貸文與顯智遇於長壽津顯智陰納降引軍退軍司元元覺之馳還請益師魏帝遣大都督侯幾紹赴之戰於滑臺東顯智以軍降紹死之七月魏帝

躬率大衆屯河橋神武至河北十餘里再遣口申誠款
魏帝不報神武乃引軍渡河魏帝問計於羣臣或云南
依賀拔勝或云西就關中或云守洛口死戰未決而元
斌之與斛斯椿爭權不睦斌之棄椿徑還紹帝云神武
兵至即日魏帝遜於長安己酉神武入洛停於永寧寺
八月甲寅召集百官謂曰為臣奉主匡救危亂若處不
諫爭出不陪隨緩則耽寵爭榮急便竄失臣節安在遂
收開府儀同三司叱列延慶兼尚書左僕射辛雄兼吏

部尚書崔孝芬都官尚書劉廐兼度支尚書楊機散騎
常侍元士弼並殺之誅其貳也士弼籍沒家口神武以
萬機不可曠廢乃與百僚議以清河王亶為大司馬居
尚書下舍而承制決事焉王稱警蹕神武醜之神武尋
至弘農遂西克潼關執毛洪賓進軍長城龍門都督薛
崇禮降神武退舍河東命行臺尚書長史薛瑜守潼關
大都督庫狄溫守封陵於蒲津西岸築城守華州以薛
紹宗為刺史高昂行豫州事神武自發晉陽至此凡四

十啓魏帝皆不答九月庚寅神武還至洛陽乃遣僧道榮奉表關中又不答乃集百僚沙門耆老議所推立以爲自孝昌衰亂國統中絕神主靡依昭穆失序永安以孝文爲伯考永熙遷孝明於夾室業喪祚短職此之由遂議立清河王世子善見議定白清河王王曰天子無父苟使兒立不惜餘生乃立之是爲孝靜帝魏於是始分爲二神武以孝武旣西恐逼嶠陝洛陽復在河外接近梁境如向晉陽形勢不能相接依議遷鄴護軍祖瑩

贊馬詔下三日車駕便發戶四十萬狼狽就道神武留洛陽部分事畢還晉陽自是軍國政務皆歸相府先是童謠曰可憐青雀子飛來鄴城裏羽翮垂欲成化作鸚鵡子好事者竊言雀子謂魏帝清河王鸚鵡謂神武也初孝昌中山胡劉蠡升自稱天子年號神嘉居雲陽谷西土歲被其寇謂之胡荒

二年正月西魏渭州刺史可朱渾道元擁衆內屬神武迎納之壬戌神武襲擊劉蠡升大破之己巳魏帝褒詔

以神武為相國假黃鉞劔履上殿入朝不趨神武固辭
三月神武欲以女妻蠡升太子候其不設備辛酉潛師
襲之其北部王斬蠡升首以送其衆復立其子南海王
神武進擊之又獲南海王及其弟西海王北海王皇后
公卿已下四百餘人胡魏五萬戶壬申神武朝于鄴四
月神武請給遷人稟各有差九月甲寅神武以州郡縣
官多非法請出使問民疾苦

三年正月甲子神武帥庫狄干等萬騎襲西魏夏州身

不火食四日而至縛稍為梯夜入其城擒其刺史費也
頭斛拔俄彌突因而用之留都督張瓊以鎮守遷其部
落五千戶以歸西魏靈州刺史曹泥與其壻涼州刺史
劉豐遣使請內屬宇文泰圍泥水灌其城不沒者四尺
神武命阿至羅發騎三萬徑度靈州繞出西軍後獲馬
五十匹西師乃退神武率騎迎泥豐遂拔其遺戶五千
以歸復泥官爵魏帝詔加神武九錫固讓乃止二月神
武令阿至羅逼西魏秦州刺史建忠王万俟普撥神武

以衆應之六月甲午普撥與其子太宰壽命于幽州刺史叱干寶樂右衛將軍破六韓常及督將三百餘人擁部來降八月丁亥神武請均斗尺班於天下九月辛亥汾州胡王迢觸曹貳龍聚衆反署立百官年號平都神武討平之十二月丁丑神武自晉陽西討遣兼僕射行臺汝陽王暹司徒高昂等趣上洛大都督竇泰入自潼關

四年正月癸丑竇泰軍敗自殺神武軍次蒲津以冰薄

不得赴救乃班師高昂攻克上洛二月乙酉神武以并肆汾建晉東雍南汾秦陝九州霜旱人飢流散請所在開倉賑給六月壬申神武如天池獲瑞石隱起成文曰六王三川十一月壬辰神武西討自蒲津濟衆二十萬宇文泰軍於沙苑神武以地阨少却西人鼓躁而進軍大亂棄器甲十有八萬神武跨橐駝候船以歸

元象元年三月辛酉神武固請解丞相魏帝許之四月庚寅神武朝于鄴壬辰還晉陽請開酒禁并賑恤宿衛

武官七月壬午行臺侯景司徒高昂圍西魏將獨孤信於金墉西魏帝及宇文泰并來赴救大都督庫狄干帥諸將前驅神武總衆繼進八月辛卯戰於河陰大破西魏軍俘獲數萬司徒高昂大都督李猛宗顯死之西師之敗獨孤信先入關宇文泰留其都督長孫子彥守金墉遂燒營以遁神武遣兵追奔至峭不及而還初神武知西師來侵自晉陽率衆馳赴至孟津未濟而軍有勝負既而神武渡河子彥亦棄城走神武遂毀金墉而還

十一月庚午神武朝於京師十二月壬辰還晉陽

興和元年七月丁丑魏帝進神武為相國錄尚書事固讓乃止十一月乙丑神武以新宮成朝於鄴魏帝與神武讌射神武降階下稱賀又辭渤海王及都督中外諸軍事詔不許十二月戊戌神武還晉陽

二年十二月阿至羅別部遣使請降神武帥衆迎之出武州塞不見大獵而還

三年五月神武巡北境使使與蠕蠕和

四年五月辛巳神武朝于鄴請令百官每月面敷政事
明揚仄陋納諫屏邪親理獄訟褒黜勤怠牧守有憊節
級相坐椒掖之內進御以序後園鷹犬悉皆棄之六月
甲辰神武還晉陽九月神武西征十月巳亥圍西魏儀
同三司王思政於玉壁城欲以致敵西師不敢出十一
月癸未神武以大雪士卒多死乃班師

武定元年二月壬申北豫州刺史高慎據虎牢西叛三
月壬辰宇文泰率衆援高慎圍河橋南城戊申神武大

敗之於芒山擒西魏督將以下四百餘人俘斬六萬計
是時軍士有盜殺驢者軍令應死神武弗殺將至并州
決之明日復戰奔西軍告神武所在西師盡銳來攻衆
潰神武失馬赫連陽順下馬以授神武與蒼頭馮文洛
扶上馬俱走從者步騎六七人追騎至親信都督尉興
慶曰王去矣興慶腰邊百箭足殺百人神武勉之曰事
濟以爾為懷州若死則用爾子興慶曰兒小願用兄許
之興慶鬪矢盡而死西魏太師賀拔勝以十三騎逐神

武河州刺史劉洪徽射中其二勝稍將中神武段孝先
橫射勝馬殪遂免豫洛二州平神武使劉豐追奔徇地
至恒農而還七月神武貽宇文泰書責以殺孝武之罪
八月辛未魏帝詔神武為相國錄尚書事大行臺餘如
故固辭乃止是月神武命於肆州北山築城西自馬陵
戍東至土陞四十日罷十二月己卯神武朝於京師庚
辰還晉陽

二年三月癸巳神武巡行冀定二州因朝京師以冬春

亢旱請蠲縣責賑窮乏宥死罪以下又請授老人板職
各有差四月丙辰神武還晉陽十一月神武討山胡破
平之俘獲一萬餘戶令配諸州

三年正月甲午開府儀同三司爾朱文暢開府司馬任
胄都督鄭仲禮中府主簿李世林前開府參軍房子遠
等謀殺神武因十五日夜打簇懷刃而入其黨薛季孝
以告並伏誅丁未神武請於并州置晉陽宮以處配口
三月乙未神武朝鄴丙午還晉陽十月丁卯神武上言

幽安定三州北接奚蠕蠕請於險要修立城戍以防之
躬自臨履莫不嚴固己未神武請釋芒山俘桎梏配以
人間寡婦

四年八月癸巳神武將西伐自鄴會兵於晉陽殿中將
軍曹魏祖曰不可今八月西方王以死氣逆生氣為客
不利主人則可兵果行傷大將神武不從自東西魏構
兵鄴下每先有黃黑螳陣鬪占者以為黃者東魏戎衣
色黑者西魏戎衣色人間以此候勝負是時黃螳盡死

九月神武圍玉壁以挑西師西師不敢應西魏晉州刺史韋孝寬守玉壁城中出鐵面神武使元盜射之每中其目用李業興孤虛術萃其北北天險也乃起土山鑿十道又於東面鑿二十一道以攻之城中無水汲於汾神武使移汾一夜而畢孝寬奪據土山頓軍五旬城不拔死者七萬人聚為一冢有星墜於神武營衆驢並鳴士皆驚懼神武有疾十一月庚子輿疾班師庚戌遣太原公洋鎮鄴辛亥徵世子澄至晉陽有惡鳥集於亭樹

世子使斛律光射殺之已卯神武以無功表解都督中外諸軍事魏帝優詔許焉是時西魏言神武中弩神武聞之乃勉坐見諸貴使斛律金敕勒歌神武自和之哀感流涕侯景素輕世子嘗謂司馬子如曰王在吾不敢有異王無吾不能與鮮卑小兒共事子如掩其口至是世子為神武書召景景先與神武約得書書有微點乃來書至無點景不至又聞神武疾遂擁兵自固神武謂世子曰我雖疾爾面更有餘憂色何也世子未對又問

曰豈非憂侯景叛邪曰然神武曰景專制河南十四年
矣常有飛揚跋扈志顧我能養豈為汝駕御也今四方
未定勿遽發哀庫狄干鮮卑老公斛律金勅勒老公並
性道直終不負汝可朱渾道元劉豐生遠來投我必無
異心賀拔焉過兒樸實無罪過潘相樂今本作道人心
和厚汝兄弟當得其力韓軌少戇宜寬借之彭相樂心
腹難得宜防護之少堪敵侯景者唯有慕容紹宗我故
不貴之留以與汝宜深加殊禮委以經略

五年正月朔日蝕神武曰日蝕其為我邪死亦何恨丙午陳啓於魏帝是日崩於晉陽時年五十二秘不發喪六月壬午魏帝於東堂舉哀三日制總纓詔凶禮依漢大將軍霍光東平王蒼故事贈假黃鉞使持節相國都督中外諸軍事齊王璽紱輜輶車黃屋左纛前後羽葆鼓吹輕車介士兼備九錫殊禮諡獻武王八月甲申葬於鄴西北漳水之西魏帝臨送於紫陌天保初追崇為獻武帝廟號太祖陵曰義平天統元年改諡神武皇帝

廟號高祖神武性深密高岸終日儼然人不能測機權
之際變化若神至於軍國大略獨運懷抱文武將吏罕
有預之經馭軍衆法令嚴肅臨敵制勝策出無方聽斷
昭察不可欺犯知人好士全護勲舊性周給每有文教
常殷勤款悉指事論心不尚綺靡擢人授任在於得才
苟其所堪乃至拔於廩養有虛聲無實者稀見任用諸
將出討奉行方略罔不克捷違失指畫多致奔亡雅尚
儉素刀劍鞍勒無金玉之飾少能劇飲自當大任不過

三爵居家如官仁恕愛士始范陽盧景裕以明經稱魯郡韓毅以工書顯咸以謀逆見禽並蒙恩置之第館教授諸子其文武之士盡節所事見執獲而不罪者甚多故遐邇歸心皆思効力至南和梁國北懷蠕蠕吐谷渾阿至羅咸所招納獲其力用規略遠矣

世宗文襄皇帝諱澄字子惠神武長子也母曰婁太后生而岐嶷神武異之

魏中興元年立為渤海王世子就杜詢講學敏悟過人

詢甚歎服

二年加侍中開府儀同三司尚孝靜帝妹馮翊長公主
時年十二神情雋爽便若成人神武試問以時事得失
辨析無不中理自是軍國籌策皆預之

天平元年加使持節尚書令大行臺并州刺史

三年入輔朝政加領軍左右京畿大都督時人雖聞器
識猶以少年期之而機略嚴明事無疑滯於是朝野震
肅

元象元年攝吏部尚書魏自崔亮以後選人常以年勞為制文襄乃釐改前式銓擢唯在得人又沙汰尚書郎妙選人地以充之至於才名之士咸被薦擢假有未居顯位者皆致之門下以為賓客每山園游宴必見招攜執射賦詩各盡其所長以為娛適

興和二年加大將軍領中書監仍攝吏部尚書自正光已後天下多事在任羣官廉潔者寡文襄乃奏吏部崔暹為御史中尉糾劾權豪無所縱捨於是風俗更始私

枉路絕乃勝於街衢具論經國政術仍開直言之路有
論事上書苦言切至者皆優容之

武定四年十一月神武西討不豫班師文襄馳赴軍所
侍衛還晉陽

五年正月丙午神武崩秘不發喪辛亥司徒侯景據河
南反潁川刺史司馬世雲以城應之景誘執豫州刺史
高元成襄州刺史李密廣州刺史暴顯等遣司空韓軌
率衆討之四月壬申文襄朝于鄴六月己巳韓軌等自

潁川班師丁丑文襄還晉陽乃發喪告喻文武陳神武遺志七月戊戌魏帝詔以文襄為使持節大丞相都督中外諸軍錄尚書事大行臺勃海王文襄啓辭位願停王爵壬寅魏帝詔太原公洋攝理軍國遣中使敦喻八月戊辰文襄啓申神武遺令請減國邑分封將督各有差辛未朝于鄴固辭丞相魏帝詔曰既朝野攸馮安危所繫不得令遂本懷須有權奪可復前大將軍餘如故壬辰尚書祠部郎中元瑾梁降人苟濟長秋卿劉思逸

及淮南王宣洪華山王大器濟北王徽等謀害文襄事
發伏誅九月己亥文襄請舊勲灼然未蒙齒錄者悉求
旌賞朝士名行有聞或以年耆疾滿告謝者准其本秩
授以州郡不得莅事聽蔭子孫自天平元以來遇事
亡官者聽復本資豪貴之家不得占護山澤其第宇車
服婚姻送葬奢僭無限者並令禁斷從太昌元以來
將帥有殊功異効者其子弟年十歲以上請聽依第出
身其兵士從征身殞陣場者蠲其家租課若有藏器避

世者以禮招致隨才擢叙罷營構之官在朝百司怠惰
不勤有所曠廢者免所居官若清幹克濟皎然可知者
即宜超叙不拘常式辛丑文襄還晉陽

六年正月己未文襄朝于鄴二月己卯梁遣使慰文襄
并請通和文襄許其和而不答書侯景之叛也南兗州
刺史石長宣頗相影響諸州刺史守令佐史多被誣誤
景破後悉被禽獲尚書咸處極刑文襄並請減降於是
斬長宣其餘並從寬宥三月戊申文襄請朝臣及牧守

令長各舉賢良及驍武膽略堪守邊城者務在得才不拘職素其稱事六品散官五品以上朝廷所悉不在舉限其稱事七品散官六品以下并及州郡縣雜白身不限在官解職並任舉之隨才進擢辛亥文襄南臨黎陽濟於虎牢自洛陽從太行而反晉陽於路遺書朝士以相戒厲於是朝野承風莫不震肅六月文襄巡北邊城戍振賜各有差七月乙卯文襄朝于鄴八月庚寅還晉陽使大行臺慕容紹宗與太尉高岳大都督劉豐討王

思政於潁川先是文襄遣行臺尚書辛術率諸將略江淮之北至是凡所獲二十三州

七年四月甲辰魏帝進文襄位相國封齊王綠綬綬贊拜不名入朝不趨劔履上殿食冀州之勃海長樂安德武邑瀛州之河間五郡邑十五萬戶使持節都督中外諸軍事錄尚書大行臺並如故丁未文襄入朝固讓魏帝不許五月戊寅文襄帥師自鄴赴潁川六月丙申克潁川禽西魏大將軍王思政以忠於所事釋而待之七

月文襄朝于鄴請魏帝立皇太子復辭爵位殊禮未報
八月辛卯遇盜而崩初梁將蘭欽子京見虜文襄以配
厨欽求贖之不許京再訴文襄使監厨蒼頭薛豐洛杖
之曰更訴當殺汝京與其黨六人謀作亂時文襄將受
魏禪與陳元康崔季舒屏左右謀於北城東栢堂太史
啓言宰輔星甚微變不一月時京將進食文襄却之謂
人曰昨夜夢死奴斫我又曰急殺却京聞之寘刀於盤
下冒言進食文襄見之怒曰我未索食何遽來京揮刀

曰將殺汝文襄自投傷足入牀下賊黨至因見弑時年二十九祕不發喪明年正月辛酉魏帝舉哀於太極東堂詔贈物八萬段凶事依漢大將軍霍光東平王蒼故事贈假黃鉞使持節相國都督中外諸軍事齊王璽綬輜輶車黃屋左纛後部羽葆鼓吹輕車介士備九錫禮諡曰文襄王二月甲申葬於義平陵之北天保初追尊曰文襄皇帝廟號世宗陵曰峻成文襄美姿容善言笑談詭之際從容弘雅性聰警多籌策當朝作相聽斷如

流愛士好賢待之以禮有神武之風焉然少壯氣猛嚴峻刑法高慎西叛侯景南翻非直本懷狼戾兼亦有懼威略情欲奢淫動乖制度嘗於宮西造宅牆院高廣廳事宏壯亞太極殿神武入朝責之乃止

顯祖文宣皇帝諱洋字子進神武第二子文襄之母弟也武明太后初孕帝每夜有赤光照室太后私怪之及產命之曰侯尼干鮮卑言有相子也以生於晉陽一名晉陽樂時神武家徒壁立后與親姻相對共憂寒餒帝

生始數月尚未能言歟然曰得活太后及左右大驚不敢言及長黑色大頰兌下鱗身重蹠瞻視審定不好戲弄深沈有大度晉陽有沙門乍愚乍知時人不測呼為阿禿師太后見諸子焉歷問祿位至帝再三舉手指天而已口無所言見者異之神武嘗從諸子過鳳陽門有龍在上唯神武與帝見之內雖明敏貌若不足文襄每嗤之曰此人亦得富貴相法亦何由可解神武以帝貌陋神彩不甚發揚曾問以時事帝略有所辨儻語一事

必得事衷又嘗令諸子各使理亂絲帝獨抽刀斬之曰
亂者須斬神武以為然又各配兵四出而使彭樂率甲
騎偽攻之文襄等怖撓帝勒衆與彭樂相格樂免胄言
情猶禽之以獻由是神武稱異之謂長史薛琚曰此兒
意識過吾琚亦私怪之幼時師事范陽盧景裕默識常
過人未嘗有所自明景裕不能測也天平二年封太原
郡公累遷尚書左僕射後從文襄行過遼陽山獨見天
門開餘無人見者武定五年神武崩猶祕凶事衆情疑

駭帝雖內嬰巨痛外若平常人情頗安魏帝授帝尚書
令中書監京畿大都督七年八月文襄遇賊帝在城東
雙堂事出倉卒內外震駭帝神色不變指麾部分自鬻
斬羣賊而漆其首祕不發喪徐言奴反大將軍被傷無
大苦也當時內外莫不驚異乃諷魏朝立皇太子因以
大赦乃赴晉陽總庶政帝內雖明察外若不了老臣宿
將皆輕帝於是帝推誠接下務從寬厚事有不便者咸
蠲省焉羣情始服八年正月辛酉魏帝為文襄舉哀於

東堂戊辰詔進帝位使持節丞相都督中外諸軍錄尚書事大行臺齊郡王食邑一萬戶三月庚申又進封齊王食冀州之勃海長樂安德武邑瀛州之河間五郡邑十萬戶帝自居晉陽寢室每夜有光如晝既為王夢人以筆點已額旦日以語館客王曇首曰吾其退乎曇首拜賀曰王上加點為主當進也五月辛亥帝如鄴光州獲九尾狐以獻甲寅魏帝遣兼太尉彭城王韶司空潘相樂奉冊進帝位相國總百揆以冀州之勃海長樂安

德武邑瀛州之河間高陽章武定州之中山常山博陵
十郡邑二十萬戶加九錫殊禮齊王如故丙辰魏帝遜
位別宮又使兼太尉彭城王韶兼司空敬顯儁奉冊禪
位致璽書於帝并奉皇帝璽綬禪代之禮一依唐虞漢
魏故事帝累表固辭詔不許於是尚書令高隆之率百
寮勸進

天保元年夏五月戊午皇帝即位於南郊升壇柴燎告
天是日鄴下獲赤雀獻于郊所事畢還宮御太極前殿

大赦改元百官進兩大階六州緣邊職人三大階自魏
孝莊已後百官絕祿至是復給焉己未詔封魏帝為中
山王追尊皇祖文穆王為文穆皇帝皇祖妣為文穆皇
后皇考獻武王為獻武皇帝皇兄文襄王為文襄皇帝
命有司議祖宗以聞辛酉尊王太后為皇太后乙酉降
魏朝封爵各有差其信都從義及宣力霸朝者又西來
人并武定六年以來南來投化者不在降限辛未遣大
使於四方觀察風俗問民疾苦甲戌遷神主於太廟六

月辛巳詔改封崇聖侯孔長為恭聖侯邑一百戶以奉孔子祀并下魯郡以時修葺廟宇又詔吉凶車服制度各有等差具立條式使儉而獲中分遣使人致祭於五嶽四瀆其堯祠舜廟下及孔父老君等載於祀典者咸秩罔遺又詔冀州之勃海長樂二郡先帝始封之國義旗初起之地并州之太原青州之齊郡霸朝所在王命是基君子有作貴不忘本齊郡勃海可并復一年長樂復二年太原復三年壬午詔故太傅孫騰故太保尉景

故大司馬婁昭故司徒高敖曹故尚書左僕射慕容紹
宗故領軍万俟干故定州刺史段榮故御史中尉劉貴
故御史中尉竇泰故殷州刺史劉豐故濟州刺史蔡雋
等並左右先帝經贊皇基或不幸早殂或隕身王事可
遣使者就墓致祭并撫問妻子又詔封宗室太尉高岳
為清河王太保高隆之為平原王開府儀同三司高歸
彥為平秦王徐州刺史高思宗為上洛王營州刺史高
長弼為廣武王兼武衛將軍高普為武興王兼武衛將

軍高子瑗為平昌王兼北中郎將高顯國為襄樂王前
太子庶子高叡為趙郡王揚州縣開國公高孝緒為脩
城王又詔封功臣太師庫狄干為章武王大司馬斛律
金為咸陽王并州刺史賀拔仁為安定王殷州刺史韓
軌為安德王瀛州刺史可朱渾道元為扶風王司徒公
彭樂為陳留王司空公潘相樂為河東王癸未詔封諸
弟青州刺史浚為永安王尚書左僕射淹為平陽王定
州刺史浹為彭城王儀同三司演為常山王冀州刺史

渙為上黨王儀同三司涑為襄城王儀同三司湛為長
廣王潛為任城王湜為高陽王濟為博陵王凝為新平
王潤為馮翊王洽為漢陽王丁亥詔立王子殷為皇太
子王后李氏為皇后庚寅詔以太師庾狄干為太宰司
徒彭樂為太尉司空潘相樂為司徒開府儀同三司司
馬子如為司空己亥以皇太子初入東宮赦畿內及并
州死罪已下降餘州死罪已下囚秋七月辛亥尊文襄
妃元氏為文襄皇后宮曰靖德又封文襄子孝琬為河

間王孝瑜為河南王乙卯以尚書令平原王封隆之為
錄尚書事尚書左僕射平陽王淹為尚書令改御史中
尉還為中丞詔魏御府所有珍奇雜綵常所不給人者
悉送內後園以供七日宴賜八月詔郡國修立黌宇敦
述儒風其國子學生亦依舊銓補往者文襄皇帝所運
蔡邕石經五十二枚移置學館依次修立又詔求直言
正諫之士待以不次之命牧人之官廣勸農桑庚寅詔
曰朕以虛薄嗣弘王業思所以贊揚盛績播之萬古雖

史官執筆有聞無墜猶恐緒言遺美時或未書在位三公文武大小降及庶人爰至僧徒或親奉音旨或承傳旁說凡可載之文籍悉條封上甲午詔曰魏世議定麟趾格遂為通制官司施用猶未盡善羣官可更論討新令未成之間仍以舊格從事九月癸丑以領東夷校尉遼東郡開國公高麗王成為使持節侍中驃騎大將軍領護東夷校尉王公如故丁卯詔以梁侍中使持節假黃鉞都督中外諸軍事大將軍承制邵陵王蕭綸為梁

王庚午幸晉陽是日皇太子入居涼風堂監國冬十月
己卯法駕御金輅入晉陽宮朝皇太后於內殿辛巳曲
赦并州太原郡晉陽縣及相國府四獄囚乙酉以特進
元紹為尚書左僕射并州刺史段韶為右僕射壬辰罷
相國府留騎兵外兵曹各立一省別掌機密十一月宇
文泰帥師至陝城分騎北度至建州甲寅梁湘東王蕭
繹遣使朝貢丙寅帝親戎出次城東宇文泰見軍容嚴
盛歎曰高歡不死矣遂班師十二月辛丑車駕至自晉

陽是歲高麗蠕蠕吐谷渾庫莫奚並遣使朝貢

二年春正月丁未梁湘東王蕭繹遣使朝貢辛亥祀圜
丘以神武皇帝配癸亥親耕籍田乙丑享太廟二月壬
辰太尉彭樂謀反伏誅三月丙午襄城王淸薨己未詔
梁承制湘東王繹為梁使持節假黃鉞相國建梁臺總
百揆承制梁王庾申司空司馬子如坐事免是月梁交
梁義新四州刺史各以地內附西魏文帝崩夏四月壬
辰梁王蕭繹遣使朝貢六月庚午以前司空司馬子如

為太尉秋七月己卯改顯陽殿還為昭陽殿辛卯改殷
州為趙州以避太子之諱是月侯景廢梁簡文帝立蕭
棟為主九月壬申免諸伎作屯牧雜色役隸之徒為白
戶癸巳行幸趙定二州因至晉陽冬十月戊申起宣光
建始嘉福仁壽諸殿庚申蕭繹遣使朝貢丁卯文襄皇
帝神主入于廟十一月侯景廢梁主棟僭即偽位於建
鄴自稱曰漢十二月中山王殂是歲蠕蠕室韋高麗並
遣使朝貢

三年春正月丙申帝親討庫莫奚於代郡大破之以其口配山東為百姓二月蠕蠕主阿那瓌為突厥所破瓌自殺其太子菴羅辰及瓌從弟登注俟刑登注子庫提並擁衆來奔蠕蠕餘衆立注次子鐵伐為主辛丑契丹遣使朝貢三月戊子詔清河王岳司徒潘相樂行臺辛術帥師南伐癸巳詔進梁王蕭繹為梁主夏四月壬申東南道行臺辛術於廣陵送傳國八璽甲申以吏部尚書楊愔為尚書右僕射六月己亥清河王岳等班師乙

卯車駕幸晉陽冬十月乙未次黃櫨嶺仍從長城北至
社于戌四百餘里立三十六戌十一月辛巳梁主蕭繹
即位於江陵是為元帝遣使來聘十二月壬子車駕還
宮戊午幸晉陽是歲西魏廢帝元年

四年春正月丙子山胡圍離石戊帝親討之未至而逃
因巡三堆戌大狩而旋戊寅庫莫奚遣使朝貢自魏末
用永安錢又有數品皆輕濫己丑鑄新錢文曰常平五
銖二月送蠕蠕鐵伐父登注及子庫提還北鐵伐尋為

契丹所殺國人復立登注為主仍為其大人阿富提等
所殺國人復立庫提為主夏四月車駕還宮戊午西南
有大聲如雷五月庚午校獵於林慮山戊子還宮六月
甲辰章武王庫狄干薨秋北巡冀定幽安仍北討契丹
冬十月丁酉車駕至平州遂西道趣長塹甲辰帝步踰
山嶺為士卒先指麾奮擊大破契丹是行也帝露頭袒
身晝夜不息行千餘里唯食肉飲水氣色彌厲丁巳登
碣石山臨滄海十一月己未帝自平州還遂如晉陽閏

月壬寅梁人來聘十二月己未突厥復攻蠕蠕舉國來奔癸亥帝北討突厥迎納蠕蠕乃廢其主庫提立阿那瓌子菴羅辰為主置之馬邑川追突厥於朔方突厥請降許之而還自是貢獻相繼

五年春正月癸丑帝討山胡大破之男子十二已上皆斬女子及幼弱以賞軍士遂平石樓石樓絕險自魏代所不能至於是遠近山胡莫不懾伏是役也有都督戰傷其什長路暉禮不能救帝命剗其五藏使九人分食

之肉及穢惡皆盡自是始行威虐是月宇文泰廢西魏
帝而立齊王廓是為恭帝三月蠕蠕菴羅辰叛帝親討
大破之辰父子北遁太保賀拔仁坐違緩拔其髮免為
庶人使負炭輸晉陽宮夏四月蠕蠕寇肆州丁巳帝自
晉陽討之至恒州時虜騎散走大軍已還帝帥麾下二
千餘騎為殿夜宿黃瓜堆蠕蠕別部數萬騎扣鞍而進
四面圍逼帝安睡平明方起神色自若指畫軍形潰圍
而出虜走追擊之伏尸二十里獲菴羅辰妻子生口三

萬餘五月丁亥地豆干契丹並遣使朝貢丁未北討蠕
蠕又大破之六月蠕蠕遠遁秋七月戊子肅慎遣使朝
貢壬辰降罪人庚戌至自北伐八月庚午以司州牧清
河王岳為太保以安德王軌為大司馬以扶風王可朱
渾道元為大將軍以司空尉粲為司徒以太子少師侯
莫陳相為司空以尚書令平陽王淹為錄尚書事以常
山王演為尚書令以上黨王渙為尚書右僕射丁丑行
幸晉陽辛巳錄尚書事平原王高隆之薨封冀州刺史

段韶為平原王是月詔常山王演上黨王渙清河王岳
平原王段韶率衆於洛陽西南築伐惡城新城嚴城河
南城四鎮九月帝親自臨幸欲以致西師西師不出乃
如晉陽冬十月西魏攻陷江陵殺梁元帝梁將王僧辯
在建業推其晉安王蕭方智為太宰都督中外諸軍事
承制置百官十二月庚申車駕北巡至達達嶺親覽山
川險要將起長城是歲西魏恭帝元年

六年春正月壬寅清河王岳度江克夏首梁司徒郢州

刺史陸法和請降詔以梁貞陽侯蕭淵明為梁主遣尚書右僕射上黨王渙送之江南二月甲子以陸法和為使持節都督十州諸軍事太尉大都督西南道大行臺三月丙戌上黨王渙克東關斬梁將裴之橫丙申車駕至自晉陽封文襄二子孝珩為廣寧王延宗為安德王戊戌帝臨昭陽殿決獄是月發寡婦以配軍士築長城夏五月蕭淵明入于建業六月甲子河東王潘相樂薨壬申帝親討蠕蠕甲戌諸軍大會祁連池乙亥出塞至

庫狄谷百餘里無水泉六軍渴乏俄而大雨秋七月己卯帝頓白道留輜重親率輕騎五千追蠕蠕壬午及之懷朔鎮帝躬犯矢石頻大破之遂至沃野壬辰還晉陽九月己卯車駕至自晉陽冬十月梁將陳霸先襲殺王僧辯廢蕭淵明復立蕭方智為主辛亥行幸晉陽十一月梁秦州刺史徐嗣徽南豫州刺史任約等襲據石頭城并以州內附壬辰大都督蕭軌帥衆至江遣都督柳達摩等渡江鎮石頭己亥太保清河王岳薨柳達摩為

霸先攻逼以石頭降是歲高麗庫莫奚並遣使朝貢詔
發夫一百八十萬人築城自幽州北夏口西至恒州九
百餘里

七年春正月辛丑封司空侯莫陳相為白水郡王車駕
至自晉陽於鄴城西馬射大集衆庶觀之二月辛未詔
常山王演等於涼風堂讀尚書奏案論定得失帝親決
之三月丁酉大都督蕭軌等帥衆渡江夏四月乙丑儀
同三司婁叡討智陽蠻大破之丁卯造金華殿五月漢

陽王洽薨帝以肉為斷慈遂不復食六月乙卯蕭軌等與梁師戰於鍾山西遇霖雨失利軌及都督李希光王敬寶東方老軍司裴英起並沒士卒還者十二三乙丑梁湘州刺史王琳獻馴象秋七月乙亥魏相宇文泰薨是月發山東寡婦二千六百人配軍士有夫而濫奪者十二三十一月壬子併省州三郡一百五十三縣三百八十九鎮三戌二十六十二月庚子魏恭帝遜位於周是歲庫莫奚契丹遣使朝貢修廣三臺宮殿先是自西

河總秦戍築長城東至海前後所築東西凡三千餘里
六十里一戍其要害置州鎮凡二十五所

八年春三月大熱人或暍死夏四月庚午詔禁取蝦蟹
蜆蛤之類唯許私家捕魚乙酉詔公私禁取鷹鷄以太
師咸陽王斛律金為右丞相以前大將軍扶風王可朱
渾道元為太傅以開府儀同三司賀拔仁為太保尚書
令常山王演為司空以錄尚書事長廣王湛為尚書令
以尚書右僕射楊愔為左僕射以并省尚書右僕射崔

暹為左僕射以上黨王渙為錄尚書事是月帝在城東
馬射勅京師士女悉赴觀不赴者罪以軍法七日乃止
五月辛酉冀州人劉向於鄴謀逆黨與皆伏誅秋八月
己巳庫莫奚遣使朝貢庚辰詔丘郊禘祫時祭皆市取
少牢不得割割有司監視必令豐備農社先蠶酒肉而
已雩禱風雨司人司祿靈星雜祀果餅酒脯唯當務盡
誠敬義同如在辛巳制權酤自夏至九月河北六州河
南十三州畿內八郡大蝗飛至鄴蔽日聲如風雨甲辰

詔今年遭蝗處免租冬十月乙亥梁主蕭方智遜位於
陳陳武帝遣使稱藩朝貢是歲周閔帝元年周冢宰宇文
護弒閔帝而立明帝又改元焉初於長城內築重城
自庫洛拔而東至於塢紇戌凡四百餘里

九年春二月丁亥降罪人已丑詔燎野限以仲冬不得
他時行火損昆蟲草木三月丁酉車駕至自晉陽夏四
月辛巳大赦是月北豫州刺史司馬消難以城叛于周
大旱帝以祈雨不降毀西門豹祠掘其冢五月辛丑以

尚書令長廣王湛為錄尚書事以驃騎大將軍平秦王
歸彥為右僕射甲辰以前左僕射楊愔為尚書令六月
乙丑帝自晉陽北巡己巳至祁連池戊寅還晉陽是夏
山東大蝗差人夫捕而坑之秋七月辛丑給畿內老人
劉奴等九百四十三人版職及杖帽各有差戊申詔趙
燕瀛定南營五州及司州廣平清河二郡去年蝨澇損
田兼春夏少雨苗稼薄者免今年租稅八月乙丑車駕
至自晉陽甲戌行幸晉陽先是發丁匠三十餘萬人營

三臺於鄴因其舊基而高博之大起宮室及遊豫園至
是三臺成改銅爵曰金鳳金虎曰聖應冰井曰崇光冬
十一月甲午車駕至自晉陽登三臺御乾象殿朝宴羣
臣以新宮成丁酉大赦内外文武官並進一大階丁巳
梁湘州刺史王琳遣使請立蕭莊為梁主進居九派戊
寅以太傅可朱渾道元為太師以司徒尉粲為太尉以
冀州刺史段韶為司空以錄尚書事常山王演為大司
馬以錄尚書事長廣王湛為司徒起大莊嚴寺是歲殺

永安王浚上黨王渙

十年春正月戊戌以司空侯莫陳相為大將軍辛丑太尉長樂郡公尉粲肆州刺史濮陽公婁仲遠並進爵為王甲寅行幸遼陽甘露寺二月丙戌帝於甘露寺禪居深觀唯軍國大政奏聞三月戊戌以侍中高德正為尚書右僕射丙辰車駕至自遼陽是月梁主蕭莊至郢州遣使朝貢夏閏四月丁酉以司州牧彭城王浹為兼司空以侍中高陽王浞為尚書左僕射乙巳以兼司空彭

城王洸為兼大尉攝司空事封皇子紹廉為長樂王五月癸未誅始平公元世東平公元景式等二十五家禁止特進元韶等十九家尋並誅之男子無少長皆斬所殺三千人並投漳水六月陳武帝殂秋八月戊戌封皇子紹義為廣陽王以尚書右僕射河間王孝琬為左僕射癸卯詔諸軍人或父祖改姓冒入元氏或假託攜認妄稱姓元者不問世數遠近悉聽改復本姓是月殺左僕射高德正九月己巳行幸晉陽冬十月甲午帝暴

崩於晉陽宮德陽堂時年三十一遺詔凶事一從儉約
喪月之斷限以三十六日嗣子百寮內外遐邇奉制割
情悉從公除癸卯發喪欽於宣德殿十一月辛未梓宮
還鄴十二月乙酉殯於太極前殿乾明元年二月丙申
葬於武寧陵謚曰文宣皇帝廟號高祖帝沈敏有遠量
外若不逮內鑒甚明文襄年長英秀神武特所愛重百
僚承風莫不震懼而帝善自晦迹言不出口恒自貶退
言咸順從故深見輕雖家人亦以為不及文襄嗣業帝

以次長見猜嫌帝后李氏色美每豫宴會容貌遠過靖
德皇后文襄彌不平焉帝每為后私營服翫小佳文襄
即令逼取后恚有時未與帝笑曰此物猶應可求兄須
何容恠文襄或愧而不取便恭受亦無飾讓每退朝還
第輒閉閣靜坐雖對妻子能竟日不言或袒跣奔躍后
問其故對曰為爾漫戲此蓋習勞而不肯言也所寢至
夜曾有光巨細可察后驚告帝帝曰慎勿妄言自此唯
與后寢侍御皆令出外文襄崩秘不發喪其後漸露魏

帝竊謂左右曰大將軍比殂似是天意威權當歸王室矣及帝將赴晉陽親入辭謁於昭陽殿從者千人居前持劔者十餘輩帝在殿下數十步立而衛士升階已二百許人皆攘袂扣刃若對嚴敵帝令主者傳奏須詣晉陽言訖再拜而出魏帝失色目送帝曰此人又似不能見容吾不知死在何日及至并州慰諭將士指辭款實衆皆欣然曰誰謂左僕射翻不減令公令公即指文襄也時訛言上黨出聖人帝聞之將徙一郡而郡人張思

進上言殿下生於南宮坊名上黨即是上黨出聖人帝
悅而止先是童謠曰一束藁兩頭然河邊殺羝飛上天
藁然兩頭於文為高河邊殺羝為水邊羊指帝名也於
是徐之才盛陳宜受禪帝曰先父亡兄功德如此尚終
北面吾又何敢當之才曰正為不及父兄須早升九五
如其不作人將生心且識云羊飲盟津角柱天盟津水
也羊飲水王名也角柱天大位也又陽平郡界回星驛
傍有大水土人常見羣羊數百立臥其中就視不見事

與讖合願王勿疑帝以問高德正德正又贊成之於是始決乃使李密卜之遇大畜曰大吉漢文帝之卦也帝乃鑄象以卜之一寫而成使段韶問斛律金於肆州金來朝深言不可以鎧曹宗景業首陳符命請殺之乃議於太后前太后謂諸貴曰我兒獰直必自無此意直高德正樂禍教之耳帝意決乃整兵而東使高德正之鄴諷喻公卿莫有應者司馬子如逆帝於遼陽固言未可杜弼亦抱馬諫帝欲還尚食丞李集曰此行事非小而

言還帝偽言使向東門殺之而別令賜絹十疋四月夜
未生於魏帝銅研旦長數寸有穗五月帝復東赴鄴令
左右曰異言者斬是月光州獻九尾狐帝至鄴城南召
入并齋版策旦高隆之進謁曰用此何為帝作色曰我
自作事若欲族滅耶隆之謝而退於是乃作園丘備法
物草禪讓事及登極之後神明轉茂外柔內剛果於斷
割人莫能窺又特明吏事留心政術簡靖寬和坦於任
使故楊惲等得盡於匡贊朝政粲然兼以法馭下不避

權貴或有違犯不容勲戚內外莫不肅然至於軍國機策獨決懷抱規謀宏遠有人君大畧又以三方鼎峙繕甲練兵左右宿衛置百保軍士每臨行陣親當矢石鋒刃交接唯恐前敵不多屢犯艱厄常致克捷嘗追及蠕蠕令都督高阿那肱率騎數千塞其走道時虜軍猶有五萬餘人肱以兵少請益帝更減其半騎那肱奮擊遂大破之虜主踰越巖谷僅以身免都督高元海王師羅並無武藝先稱怯弱一旦交鋒有踰驍壯嘗於東山游

宴以關隴未平投盃震怒召魏收於前立為詔書宣示
遠近將軍西行是歲宇文泰殂西人震恐常為度隴之
計既征伐四克威振戎夏六七年後以功業自矜遂留
情耽湎肆行淫暴或躬自鼓舞歌謳不息從旦通宵以
夜繼晷或袒露形體塗傅粉黛散髮胡服雜衣錦綵拔
刃張弓游行市肆勲戚之第朝夕臨幸時乘鹿車白象
駱駝牛驢並不施鞍勒或盛暑炎赫日中暴身隆冬酷
寒去衣馳走從者不堪帝居之自若街坐巷宿處處游

行多使劉桃枝崔季舒負之而行或擔胡鼓而拍之親
戚貴臣左右近習侍從錯雜無復差等徵集淫媼悉去
衣裳分付從官朝夕臨視或聚棘為馬紐草為索逼遣
乘騎牽引來去流血灑地以為娛樂凡諸殺害多令支
解或焚之於火或投之於河沈酗既久彌以狂惑每至
將醉輒拔劍挂手或張弓傳矢或執持牟槊游行市鄽
問婦人曰天子何如答曰顛顛癡癡何成天子帝乃殺
之或馳騁衢路散擲錢物恣人拾取爭競諠譁方以為

喜太后嘗在北宮坐一小榻帝時已醉手自舉牀后便墜落頗有傷損醒悟之後大懷慙恨遂令多聚柴火將入其中太后驚懼親自持挽又設地席令平秦王高歸彥執杖口自責疏脫背就罰勅歸彥杖不出血當即斬汝太后涕泣前自抱之帝流涕苦請不肯受於太后太后聽許方捨背杖笞腳五十莫不至到衣冠拜謝悲不自勝因此戒酒一旬還復如初自是耽酒轉劇遂幸李后家以鳴鏑射后母崔正中其頰因罵曰吾醉時尚不

識太后老婢何事馬鞭亂打一百有餘三臺構木高二
十七丈兩棟相距二百餘尺工匠危怯皆繫繩自防帝
登脊疾走都無怖畏時復雅憐折旋中節傍人見者莫
不寒心又召死囚以席為翅從臺飛下免其罪戮果敢
不慮者盡皆獲全疑怯猶豫者或致損跌沈酗既久轉
虧本性怒大司農穆子容使之脫衣而伏親射之不中
以楸貫其下竅入腸雖以楊愔為宰輔使進廁箠以其
體肥呼為楊大肚馬鞭鞭其背流血浹袍以刀子斃其

腹崔季舒託俳言曰老小公子惡戲因掣刀子而去之
又置愔於棺中載以轎車幾下釘者數四曾至彭城王
浹宅謂其母爾朱曰憶汝奪我母壻時向何由可耐手
自刃殺又至故僕射崔暹第謂暹妻李曰頗憶暹不李
曰結髮義深實懷追憶帝曰若憶時自往看也親自斬
之棄頭牆外嘗在晉陽以稍戲刺都督尉子耀應手而
死在三臺大光殿上鋸殺都督穆嵩又幸開府暴顯家
有都督韓哲無罪忽衆中召斬之數段魏樂安王元昂

后之姊壻其妻有色帝數幸之欲納為昭儀召昂令伏以鳴鏑射一百餘下凝血垂將一石竟至於死後帝自往弔哭於喪次逼擁其妻仍令從官脫衣助襴兼錢綵號為信物一日所得將踰巨萬后啼不食乞讓位於姊太后又為言帝意乃釋所幸薛嬪甚被寵愛忽憶其經與高岳私通無故斬首藏之於懷於東山宴勸酬始合忽探出頭投於枰上支解其屍弄其髀為琵琶一座驚怖莫不喪膽帝方收取對之流淚云佳人難再得甚可

惜也載屍以出被髮步哭而隨之至有閭巷庸猥人無識知者忽令召斬鄴下繫徒罪至大辟簡取隨駕號為供御囚手自刃殺持以為戲凡所屠害動多支解或投之烈火或棄之漳流兼以外築長城內營臺殿賞費過度天下騷然內外惛惛各懷怨毒而素嚴斷臨下加之默識彊記百寮戰慄不敢為非曾有典御丞李集面諫比帝有甚於桀紂帝令縛置流中沈沒久之復令引出謂曰吾何如桀紂集曰向來彌不及矣帝又令沈之引

出更問如此數四集對如初帝大笑曰天下有如此癡漢方知龍逢比干非是俊物遂解放之又被引入見似有所諫帝令將出要斬其或斬或赦莫能測焉初帝登阼改年為天保士有深識者曰天保之字為一大人只十帝其不過十乎又先是謠云馬子入石室三千六百日帝以午年生故曰馬子三臺石虎舊居故曰石室三千六百日十年也又帝曾問泰山道士曰吾得幾年天子答曰得三十年道士出後帝謂李后曰十年十月十

日得非三十也吾甚畏之過此無慮人生有死何得致
惜但憐正道尚幼人將奪之耳帝及期而崩濟南竟不
終位時以為知命曾幸晉陽夜宿扛門嶺嶺有數株栢
樹皆將千年枝葉嫩茂似有神物所託時帝已被酒向
嶺瞋罵射中一株未幾立枯而死又出言屢中時人故
謂之神靈雖為猖獗不專云昏暴末年遂不能進食唯
數飲酒麴蘖成災因而致斃先是霍州發楚夷王女冢
尸如生焉得珠襦玉匣帝珍之遂以歛焉初祖珽以險

薄多過帝數罪之每謂為老賊及武成時珽被任遇乃說武成曰文宣甚暴何得稱文既非創業何得稱祖若文宣為祖陛下萬歲後將何以稱武成溺於珽說天統初有詔改諡景烈廟號威宗武平初趙彥深執政又奏復帝本諡廟號顯祖云

文宣帝天保十年

廢帝濟南王諱殷字正道小名道人文宣之長子也母曰李皇后天保元年立為皇太子時年六歲性敏慧初

學反語於跡字下注云自反時侍者未達其故太子曰
跡字足傍亦為跡豈非自反邪嘗宴北宮獨令河間王
勿入左右問其故太子曰世宗遇賊處河間王復何宜
在此文宣每言太子得漢家性質不似我欲廢之立太
原王初詔國子博士李寶鼎傳之寶鼎卒復詔國子博
士邢峙侍講太子雖富於春秋而溫裕開朗有人君之
度貫綜經業省覽時政甚有美名七年冬文宣召朝臣
文學者及禮學官於宮宴會令以經義相質親自臨聽

太子手筆措問在坐莫不歎美九年文宣在晉陽太子
監國集諸儒講孝經令楊愔傳旨謂國子助教許散愁
曰先生在世何以自資對曰散愁自少以來不登嬖童
之牀不入季女之室服膺簡策不知老之將至平生素
懷若斯而已太子曰顏子縮屋稱貞柳下嫗而不亂未
若此翁白首不娶者也乃賚絹百疋後文宣登金鳳臺
召太子使手刃囚太子惻然有難色再三不斷其首文
宣怒親以馬鞭撞太子三下由是氣悸語吃精神時復

昏擾十年十月文宣崩癸卯太子即帝位於晉陽宣德
殿大赦內外百官普加汎級亡官失爵聽復資品庚戌
尊皇太后為太皇太后皇后為皇太后詔九州軍人七
十已上授以版職武官年六十已上及癯病不堪驅使
者並皆放免土木營造金銀銅鐵諸雜作工一切停罷
十一月乙卯以右丞相咸陽王斛律金為左丞相以錄
尚書事常山王演為太傅以司徒長廣王湛為太尉以
司空段韶為司徒以平陽王淹為司空高陽王浟為尚

書左僕射河間王孝琬為司州牧侍中燕子獻為右僕射戊午分命使者巡省四方求政得失省察風俗問民疾苦十二月戊戌改封上黨王紹仁為漁陽王廣陽王紹義為范陽王長樂王紹廣為隴西王是歲周武成元年

乾明元年春正月癸丑朔改元己未詔寬徭賦癸亥高陽王浟薨是月車駕至自晉陽己亥以太傅常山王演為太師錄尚書事以太尉長廣王湛為大司馬并省錄

尚書事以尚書左僕射平秦王歸彥為司空趙郡王叡
為尚書左僕射詔諸元良口配沒官內及賜人者並放
免甲辰帝幸芳林園親錄囚徒死罪已下降免各有差
乙巳太師常山王演矯詔誅尚書令楊愔尚書右僕射
燕子獻領軍大將軍可朱渾天和侍中宋欽道散騎常
侍鄭子默戊申以常山王演為大丞相都督中外諸軍
錄尚書事以大司馬長廣王湛為太傅京畿大都督以
司徒段韶為大將軍以前司空平陽王淹為太尉以司

空平秦王歸彥為司徒彭城王浹為尚書令又以高麗王世子湯為使持節領東夷校尉遼東郡公高麗王是月王琳為陳所敗蕭莊自拔至和州三月甲寅詔軍國事皆申晉陽票大丞相常山王規竿士申封文襄第二子孝珩為廣陵王第三子長恭為蘭陵王夏四月癸亥詔河南定冀趙瀛滄南膠光南青九州往因蝨水頗傷時稼遣使分塗贍恤是月周明帝崩五月壬子以開府儀同三司劉洪徽為尚書右僕射秋八月壬午太皇太

后令廢帝為濟南王全食一郡以大丞相常山王演入
纂大統是日王居別宮皇建二年九月殂於晉陽時年
十七帝聰慧夙成寬厚仁智天保間雅有令名及承大
位楊愔燕子獻宋欽道等同輔以常山王地親望重內
外畏服加以文宣初崩之日太后本欲立之故愔等並
懷猜忌常山王憂悵乃白太后誅其黨時平秦王歸彥
亦豫謀焉皇建二年秋天文告變歸彥慮有後害仍白
孝昭以王當咎乃遣歸彥馳馬至晉陽害之王薨後孝

昭不豫見文宣為崇孝昭深惡之厭勝術備設而無益也薨三旬而孝昭崩太寧二年葬於武寧之西北諡閔悼王初文宣命邢邵制帝名殷字正道從而尤之曰殷家弟及正字一止吾身後兒不得也邵懼請改焉文宣不許曰天也因謂孝昭曰奪時但奪慎勿殺也

廢帝濟南王乾明元年

孝昭皇帝諱演字延安神武皇帝第六子文宣皇帝之母弟也幼而英峙早有大成之量武明皇太后早所愛

重魏元象元年封常山郡公及文襄執政遣中書侍郎
李同軌就霸府為諸弟師帝所覽文籍源其指歸而不
好辭彩每歎云雖盟津之師左驂震而不劒同軌以為
能遂篤志讀漢書至李陵傳恒壯其所為焉聰敏過人
所與游處一知其家諱終身未嘗誤犯同軌病卒又命
開府長流參軍刁柔代之柔性嚴褊不適誘訓之宜中
被遣出帝送出閭慘然斂容淚數行下左右莫不歔歔
其敬業重舊如此天保初進爵為王五年除并省尚書

令帝善斷割長思理省內畏服七年從文宣還鄴文宣以尚書奏事多有異同令帝與朝臣先論定得失然後敷奏帝長於政術割斷咸盡其理文宣歎重之八年轉司空錄尚書事九年除大司馬仍錄尚書事時文宣溺於游宴帝憂憤表於神色文宣覺之謂帝曰但令汝在我何為不縱樂帝唯啼泣拜伏竟無所言文宣亦大悲抵盃於地曰汝似嫌我自今敢進酒者斬之因取所御盃盡皆壞棄後益沈湎或入諸貴戚家角力批拉不限

貴賤唯常山王至內外肅然帝又密撰事條將諫其友
王晞以為不可帝不從因間極言遂逢大怒順成后本
魏朝宗室文宣欲帝離之陰為帝廣求淑媛望移其寵
帝雖承旨有納而情義彌重帝性頗嚴尚書郎中剖斷
有失輒加捶楚令史姦慝便即考竟文宣乃立帝於前
以刀環擬胸召被帝罰者臨以白刃求帝之短咸無所
陳方見解釋自是不許笞箠郎中後賜帝魏時宮人醒
而忘之謂帝擅取遂以刀環亂築因此致困皇太后日

夜啼泣文宣不知所為先是禁帝友王晞至是乃捨之
令侍帝帝月餘漸瘳不敢復諫及文宣崩帝居禁中護
喪事幼主即位乃即朝班除太傅錄尚書事朝政皆決
於帝月餘乃居藩邸自是詔勅多不關帝客或言於帝
曰鷲鳥捨巢必有探卵之患今日之地何宜屢出乾明
元年從廢帝赴鄴居于領軍府時楊愔燕子獻可朱渾
天和宋欽道鄭子默等以帝威望既重內懼權逼請以
帝為太師司州牧錄尚書事長廣王湛為大司馬錄并

省尚書事解京畿大都督帝既以尊親而見猜斥乃與
長廣王期獵謀之於野三月甲戌帝初上省旦發領軍
府大風暴起壞所御車幔帝甚惡之及至省朝士咸集
坐定酒數行於坐執尚書令楊愔右僕射燕子獻領軍
可朱渾天和侍中宋欽道等於坐帝戎服與平原王段
韶平秦王高歸彥領軍劉洪徽入自雲龍門於中書省
前遇散騎常侍鄭子默又執之同斬於御府之內帝至
東閤門都督成休寧抽刀呵帝帝令高歸彥喻之休寧

厲聲大呼不從歸彥既為領軍素為兵士所服悉皆弛
仗休寧方歎息而罷帝入至昭陽殿幼主太皇太后皇
太后並出臨御坐帝奏愆等罪求伏專擅之辜時庭中
及兩廊下衛士二千餘人皆被甲待詔武衛娥永樂武
力絕倫又被文宣重過撫刃思効廢帝吃訥兼倉卒不
知所言太皇太后又為皇太后誓言帝無異志唯云被
逼而已高歸彥勅勞衛士解嚴永樂乃內刀而泣帝乃
令歸彥引侍衛之士向華林園以京畿軍入守門閤斬

娥永樂於園詔以帝為大丞相都督中外諸軍錄尚書
事相府佐史進位一等帝尋如晉陽有詔軍國大政咸
諮決焉帝既當大位知無不為擇其令典考綜名實廢
帝恭己以聽政太皇太后尋下令廢少主命帝統大業
皇建元年八月壬午皇帝即位於晉陽宣德殿大赦政
乾明元年為皇建詔奉太皇太后還稱皇太后皇太后
稱文宣皇后宮曰昭信乙酉詔曰太祖創業已來諸有
佐命功臣子孫絕滅國統不傳者有司搜訪近親以名

聞當量為主後諸郡國老人各授版職賜黃帽鳩杖又
詔謇正之士並聽進見陳事軍人戰亡死王事者以時
申聞當加榮贈督將朝士名望素高位歷通顯天保以
來未蒙追贈者亦皆錄奏又以廷尉中丞執法所在繩
違案罪不得僭文弄法其官奴婢年六十已上免為庶
人戊子以太傅長廣王湛為右丞相以太尉平陽王淹
為太傅以尚書令彭城王浹為大司馬壬辰詔分遣大
使巡省四方觀察風俗問民疾苦考得失搜訪賢良

甲午詔曰昔武王克殷先封往代兩漢魏晉無違茲典
及元氏統歷不率舊章朕纂承大業思弘古典但二王
三恪舊說不同可議定是非列名條奏其禮儀體式亦
仰議之又詔國子寺可備立官屬依舊置生員講習經
典歲時考試其文襄帝所運石經宜即施列於學館外
州大學亦仰典司勤加督課丙申詔九州勲人有重封
者聽分授子弟以廣骨肉之恩九月壬申詔議定三祖
樂冬十一月辛亥立妃元氏為皇后世子百年為皇太

子賜天下為父後者爵一級癸丑有司奏太祖獻武皇
帝廟宜奏武德之樂舞昭烈之舞太宗文襄皇帝廟宜
奏文德之樂舞宣政之舞高祖文宣皇帝廟宜奏文正
之樂舞光大之舞詔曰可庚申詔以故太師尉景故太
師竇泰故太師太原王婁昭故太宰章武王庫狄干故
太尉段榮故太師万俟普故司徒蔡偶故太師高乾故
司徒莫多婁貸文故太保劉貴故太保封祖裔故廣州
刺史王懷十三人配饗太祖廟庭故太師清河王岳故

太宰安德王韓軌故太宰扶風王可朱渾道元故太師
高昂故大司馬劉豐故太師万俟受洛干故太尉慕容
紹宗十一人配饗世宗廟庭故大尉河東王潘相樂故
司空薛修義故太傅破六韓常三人配饗高祖廟庭是
月帝親戎北討庫莫奚出長城虜奔遁分兵致討大獲
牛馬括總入晉陽宮十二月丙午車駕至晉陽

二年春正月辛亥祀圜丘壬子禘於太廟癸丑詔降罪
人各有差二月丁丑詔内外執事之官從五品已上及

三府主簿錄事參軍諸王文學侍御史廷尉三官尚書
郎中中書舍人每二年之內各舉一人冬十月丙子以
尚書令彭城王浹為太保長樂王尉粲為太尉己酉野
雉栖于前殿之庭十一月甲辰詔曰朕嬰此暴疾奄忽
無遠今嗣子冲眇未閑政術社稷業重理歸上德右丞
相長廣王湛研機測化體道居宗人雄之望海內瞻仰
同胞共氣家國所憑可遣尚書左僕射趙郡王叡喻旨
徵王統茲大寶其喪紀之禮一同漢文三十六日悲從

公除山陵施用務從儉約先是帝不豫而無闕聽覽是日崩於晉陽宮時年二十七太寧元年閏十二月癸卯梓宮還鄴上謚曰孝昭皇帝庚午葬於文靜陵帝聰敏有識度深沈能斷不可窺測身長八尺腰帶十圍儀望風表迥然獨秀自居臺省留心政術閑明薄領吏所不逮及正位宸居彌所刻勵輕徭薄賦勤恤人隱內無私寵外收人物雖后父位亦特進無別日昃臨朝務知人之善惡每訪問左右冀獲直言曾問舍人裴澤在外議

論得失澤率爾對曰陛下聰明至公自可遠侔古昔而有識之士咸言傷細帝王之度頗為未弘帝笑曰誠如卿言朕初臨萬機慮不周悉故致爾耳此事安可久行恐後又嫌疎漏澤因被寵遇其樂聞過也如此趙郡王獻與庫狄顯安侍坐帝曰須拔我同堂弟顯安我親姑子今序家人禮除君臣之敬可言我之不逮顯安曰陛下多妄言曰若何對曰陛下昔見文宣以馬鞭撻人常以為非而今行之非妄言邪帝握其手謝之又使直言

對曰陛下太細天子乃更似吏帝曰朕甚知之然無法
來久將整之以至無為耳又問王晞晞答如顯安皆從
容受納性至孝太后不豫出居南宮帝行不正履容色
貶悴衣不解帶殆將四旬殿去南宮五百餘步雞鳴而
去辰時方還來去徒行不乘輿輦太后所苦小增便即
寢伏閣外食飲藥物盡皆躬親太后嘗心痛不自堪忍
帝立侍帷前以爪掐手心血流出袖友愛諸弟無君臣
之隔雄勇有謀于時國富兵彊將雪神武遺恨意在頓

駕平陽為進取之策遠圖不遂惜哉初帝與濟南約不相害及輿駕在晉陽武成鎮鄴望氣者云鄴城有天子氣帝恐濟南復興乃密行鴆毒濟南不從乃扼而殺之後頗愧悔初苦內熱頻進渴散時有尚書令史姓趙於鄴見文宣從楊愔燕子獻等西行言相與復讎帝在晉陽宮與毛夫人亦見焉遂漸危篤備襁厭之事或煮油四灑或持炬燒逐諸厲方出殿梁山騎棟上歌呼自若了無懼容時有天狗下乃於其所講武以厭之有兔驚

馬帝墜而絕肋太后視疾問濟南所在者三帝不對太后怒曰殺之邪不用吾言死其宜矣臨終之際唯扶服牀枕叩頭求哀遣使詔追長廣王入纂大統又手書云宜將吾妻子置一好處勿學前人也

孝昭帝皇建二年

世祖武成皇帝諱湛神武皇帝第九子孝昭皇帝之母弟也儀表瓌傑神武尤所鍾愛神武方招懷荒遠乃為帝聘蠕蠕太子菴羅辰女號隣和公主帝時年八歲冠

服端嚴神情閑遠華戎歎異元象中封長廣郡公天保
初進爵為王拜尚書令尋兼司徒遷太尉乾明初楊愔
等密相疎忌以帝為大司馬領并州刺史帝既與孝昭
謀誅諸執政遷太傅錄尚書事領京畿大都督皇建初
進位右丞相孝昭幸晉陽帝以懿親居守鄴政事咸見
委託二年孝昭崩遺詔徵帝入統大位及至晉陽發喪
於崇德殿皇太后令所司宣遺詔左丞相斛律金率百
僚敦勸三表乃許之

大寧元年冬十一月癸丑皇帝即位於南宮大赦改皇
建二年為大寧乙卯以司徒平秦王歸彥為太傅以尚
書右僕射趙郡王叡為尚書令以太尉尉粲為太保以
尚書令段韶為大司馬以豐州刺史婁叡為司空以太
傅平陽王淹為太宰以太保彭城王浹為太師錄尚書
事以冀州刺史博陵王濟為太尉以中書監任城王湝
為尚書左僕射以并州刺史斛律光為右僕射封孝昭
皇帝太子百年為樂陵郡王庚申詔大使巡行天下求

政善惡問民疾苦擢進賢良是歲周武帝保定元年

河清元年春正月乙亥車駕至自晉陽辛巳祀南郊壬午享太廟丙戌立妃胡氏為皇后子緯為皇太子戊子大赦內外百官普加汎級諸為父後者賜爵一級己亥以前定州刺史馮翊王潤為尚書左僕射詔普斷屠殺以順春令二月丁未以太宰平陽王淹為青州刺史太傅領司徒以領軍大將軍宗師平秦王歸彥為太宰冀州刺史乙卯以兼尚書令任城王潛為司徒詔散騎常

侍崔瞻聘于陳夏四月辛丑皇太后婁氏崩乙巳青州
刺史上言今月庚寅河濟清以河濟清改大寧二年為
河清降罪人各有差五月甲申祔葬武明皇后於義平
陵己丑以尚書右僕射斛律光為尚書令秋七月太宰
冀州刺史平秦王歸彥據州反詔大司馬段韶司空婁
叡討禽之乙未斬歸彥并其三子及黨與二十人於都
市丁酉以大司馬段韶為太傅以司空婁叡為司徒以
太傅平陽王淹為太宰以尚書令斛律光為司空以太

子太傅趙郡王叡為尚書令中書監河間王孝琬為尚書左僕射癸亥行幸晉陽陳人來聘冬十一月丁丑詔兼散騎常侍封孝琬使於陳十二月丙辰車駕至自晉陽是歲殺太原王紹德

二年春正月乙亥帝詔臨朝堂策試秀孝以太子少傅魏收為兼尚書右僕射己卯兼右僕射魏收以阿縱除名丁丑以武明皇后配祭北郊辛卯帝臨都亭錄見囚降在京罪人各有差三月己丑詔司空斛律光督五營

軍士築戍於軹關壬申室韋國遣使朝貢丙戌以兼尚
書右僕射趙彥深為左僕射夏四月并汾晉東雍南汾
五州蟲旱傷稼遣使振恤戊午陳人來聘五月壬午詔
以城南雙堂之苑迴造大總持寺六月乙巳齊州上言
濟河水口見八龍升天乙卯詔兼散騎常侍崔子武使
于陳庚申司州牧河南王孝瑜薨八月辛丑詔以三臺
宮為大聖寺冬十二月癸巳陳人來聘己酉周將楊忠
帥突厥阿史那木可汗等二十餘萬人自恒州分為三

道殺掠吏民是時大雨雪連月南北千餘里平地數尺
霜晝下雨血於太原戊午帝至晉陽己未周軍逼并州
又遣大將達奚武帥衆數萬至東雍及晉州與突厥相
應是歲室韋庫莫奚韃靼契丹並遣使朝貢

三年春正月庚申朔周軍至城下而陳戰於城西周軍
及突厥大敗人畜死者相枕數百里不絕詔平原王段
韶追出塞而還三月辛酉以律令班下大赦己巳盜殺
太師彭城王浹庚辰以司空斛律光為司徒以侍中武

興王普為尚書左僕射甲申以尚書令馮翊王潤為司空
夏四月辛卯詔兼散騎常侍皇甫亮使於陳五月甲子
帝至自晉陽壬午以尚書令趙郡王叡為錄尚書事以
前司徒婁叡為太尉甲申以太傅段韶為太師丁亥以
太尉任城王潛為大將軍壬辰行幸晉陽六月庚子大
雨晝夜不息至甲辰乃止是月晉陽訛言有鬼兵百姓
競擊銅鐵以捍之殺樂陵王百年歸宇文媼于周秋九
月乙丑封皇子綽為南陽王儼為東平王是月歸閭媼

于周陳人來聘突厥寇幽州入長城虜掠而還閏月乙未詔遣十二使巡行水滂州免其租調乙巳突厥寇幽州周軍三道並出使其將尉遲迴寇洛陽楊擣入軹關權景宣趣懸瓠冬十一月甲午迴等圍洛陽戊戌詔兼散騎常侍劉逖使於陳甲辰太尉婁叡大破周軍於軹關禽楊擣十二月乙卯豫州刺史王士良以城降周將權景宣丁巳帝自晉陽南討己未太宰平陽王淹薨壬戌太師段韶大破尉遲迴等解洛陽圍丁卯帝至洛陽

免洛州經周軍處一年租賦赦州城內死罪已下囚已
已以太師段韶為太宰以司徒斛律光為太尉并州刺
史蘭陵王長恭為尚書令壬申帝至虎牢經滑臺次於
黎陽所經減降罪人丙子車駕至自洛陽是歲高麗靺
鞨新羅並遣使朝貢山東大水饑死者不可勝計詔發
粟振給事竟不行

四年春正月癸卯以大將軍任城王湝為大司馬辛未
幸晉陽二月甲寅詔以新羅國王金真興為使持節東

夷校尉樂浪郡公新羅王壬申以年穀不登禁酤酒已
卯詔減百官食粟各有差三月戊子詔給西兗梁滄趙
州司州之東郡陽平清河武都冀州之長樂勃海遭水
澇之處貧下戶粟各有差家得斗升而已又多不付是
月彗星見有物隕於殿庭如赤漆鼓帶小鈴殿上石自
起兩兩相對又有神見於後園萬壽堂前山穴中其體
壯大不辨其面兩齒絕白長出於脣帝直宿嬪御已下
七百人咸見焉帝又夢之夏四月戊午大將軍東安王

婁叡坐事免乙亥陳人來聘太史奏天文有變其占當
有易王丙子乃使太宰段韶兼太尉持節奉皇帝璽綬
傳位於皇太子大赦改元為天統元年百官進級降罪
各有差又詔皇太子妃斛律氏為皇后於是羣公上尊
號為太上皇帝軍國重事咸以奏聞始將傳政使內參
乘子尚乘驛送詔書於鄴子尚出晉陽城見人騎隨後
忽失之尚未至鄴而其言已布矣天統四年十二月辛
未太上皇帝崩於鄴宮乾壽堂時年三十二諡曰武成

皇帝廟號世祖五年二月甲申葬于永平陵

武成帝大寧元年河清四年即位五年

後主諱緯字仁綱武成皇帝之長子也母曰胡皇后后夢於海上坐玉盆日入裙下遂有娠天保七年五月五日生帝於并州邸帝少美容儀武成特所愛寵拜世子及武成入纂大業大寧二年正月丙戌立為皇太子河清四年武成禪位於帝

天統元年夏四月丙子皇帝即位於晉陽宮大赦改河

清四年為天統丁丑以太保賀拔仁為太師大尉侯莫
陳相為太保司空馮翊王潤為司徒錄尚書事趙郡王
叡為司空尚書左僕射河間王孝琬為尚書令戊寅以
瀛州刺史尉粲為太尉太尉斛律光為大將軍東安王
婁叡為太尉尚書右僕射趙彥深為左僕射六月壬戌
彗星出文昌東北其大如手後稍長乃至丈餘百日乃
滅己巳太上皇帝詔兼散騎常侍王季高使於陳秋七
月乙未太上皇帝詔增置都水使者一人冬十一月癸

未太上皇帝至自晉陽己丑太上皇帝詔改太祖獻武
皇帝為神武皇帝廟號高祖獻明皇后為武明皇后其
文宣諡號委有司議定十二月庚戌太上皇帝狩於北
郊壬子狩於南郊乙卯狩於西郊壬戌太上皇帝幸晉
陽丁卯帝至自晉陽庚午有司奏改高祖文宣皇帝為
威宗景烈皇帝是歲高麗契丹韃靼並遣使朝貢河南
大疫

二年春正月辛卯祀圜丘癸巳祫祭於太廟詔降罪人

各有差丙申以吏部尚書尉瑾為尚書右僕射庚子行
幸晉陽二月庚戌太上皇帝至自晉陽壬子陳人來聘
三月乙巳太上皇帝詔以三臺施興聖寺以旱故降禁
囚夏四月陳文帝殂五月乙酉以兼尚書左僕射武興
王普為尚書令己亥封太上皇帝子儼為東平王仁弘
為齊安王仁固為北平王仁英為高平王仁元為淮南
王六月太上皇帝詔兼散騎常侍韋道儒聘於陳秋八
月太上皇帝幸晉陽冬十月乙卯以太保侯莫陳相為

太傅大司馬任城王潛為太保太尉婁叡為大司馬徙
馮翊王潤為太尉開府儀同三司韓祖念為司徒十一
月大雨雪盜竊太廟御服十二月乙丑陳人來聘是歲
殺河間王孝琬突厥靺鞨國並遣使朝貢於周為天和
元年

三年春正月壬辰太上皇帝至自晉陽乙未大雪平地
二尺戊戌太上皇帝詔京官執事散官二品已上舉三
人五品已上各舉二人稱事七品已上及殿中侍御史

尚書都檢校御史主書及門下錄事各舉一人鄴宮九
龍殿災延燒西廊二月壬寅朔帝加元服大赦九州職
人各進四級内外百官普進二級夏四月癸丑太上皇
帝詔兼散騎常侍司馬幼之使於陳五月甲午太上皇
帝詔以領軍大將軍東平王儼為尚書令乙未大風晝
晦發屋拔樹六月己未太上皇帝詔封皇子仁機為西
河王仁約為樂浪王仁儉為潁川王仁雅為安樂王統
為丹陽王仁謙為東海王閏六月辛巳左丞相斛律金

薨壬午太上皇帝詔尚書令東平王儼錄尚書事以尚書左僕射趙彥深為尚書令并省尚書右僕射婁定遠為尚書左僕射中書監徐之才為右僕射秋八月辛未太上皇帝詔以太保任城王潛為太師太尉馮翊王潤為大司馬太宰段韶為左丞相太師賀拔仁為右丞相太傅侯莫陳相為太宰大司馬婁叡為太傅大將軍斛律光為太保司徒韓祖念為大將軍司空趙郡王叡為太尉尚書令東平王儼為司徒九月己酉太上皇帝詔

諸寺署所綰雜保戶姓高者天保之初雖有優放權假
力用未免者今可悉蠲雜戶任屬郡縣一准平民丁已
太上皇帝幸晉陽是秋山東大水人饑僵尸滿道冬十
月突厥大莫婁室韋百濟靺鞨等國各遣使朝貢十一
月丙午以晉陽大明殿成故大赦文武百官進二級免
并州居城太原一郡來年租癸未太上皇帝幸晉陽十
二月己巳太上皇帝詔以故左丞相趙郡王琛配饗神
武廟庭

四年春正月壬子詔以故清河王岳河東王潘相樂十人並配饗神武廟庭癸亥太上皇帝詔兼散騎常侍鄭大護使於陳三月乙巳太上皇帝詔以司徒東平王儼為大將軍南陽王綽為司徒開府儀同三司廣寧王孝珩為尚書令夏四月辛未鄴宮昭陽殿災及宣光瑤華等殿辛巳太上皇帝幸晉陽五月癸卯以尚書右僕射胡長仁為左僕射中書監和士開為右僕射壬戌太上皇帝至自晉陽自正月不雨至於是月六月甲子朔大

雨甲申大風拔木折樹是月彗星見于東井秋九月丙申周人來通和太上皇帝詔侍中斛斯文畧報聘于周冬十月辛巳以尚書令廣寧王孝珩為錄尚書事左僕射胡長仁為尚書令右僕射和士開為左僕射中書監唐邕為右僕射十一月壬辰太上皇帝詔兼散騎常侍李勣使於陳是月陳安成王頊廢其主伯宗而自立十二月辛未太上皇帝崩丙子大赦九州職人普加一級內外百官並加兩級戊寅上太上皇后尊號為皇太后

甲申詔細作之務及所在百工悉罷之又詔掖庭晉陽
中山宮人等及鄴下并州太官官口二處其年六十已
上及有癘患者仰所司簡放庚寅詔天保七年已來諸
家緣坐配流者所在令還是歲契丹靺鞨國並遣使朝
貢

五年春正月辛亥詔以金鳳等三臺未入寺者施大興
聖寺是月殺定州刺史博陵王濟二月乙丑詔應宮刑
者普免刑為官口又詔禁網捕鷹鷂及畜養籠放之物

癸酉大莫婁國遣使朝貢己丑改東平王儼為琅邪王
詔侍中叱列長叉使於周是月殺太尉趙郡王叡三月
丁酉以司空徐顯秀為太尉并省尚書令婁定遠為司
空是月行幸晉陽夏四月甲子詔以并州尚書省為大
基聖寺晉祠為大崇皇寺乙丑車駕至自晉陽秋七月
己丑詔降罪人各有差戊申詔使巡省河北諸州無雨
處境內徧旱者優免租調冬十月壬戌詔禁造酒十一
月辛丑詔以太保斛律光為太傅大司馬馮翊王潤為

太保大將軍琅邪王儼為大司馬十二月庚午以開府儀同三司蘭陵王長恭為尚書令庚辰以中書監魏收為尚書右僕射

武平元年春正月乙酉朔改元太師并州刺史東安王婁叡薨戊申詔兼散騎常侍裴獻之聘於陳二月癸亥以百濟王餘昌為使持節侍中驃騎大將軍帶方郡公王如故己巳以太傅咸陽王斛律光為右丞相并州刺史右丞相安定王賀拔仁為錄尚書事冀州刺史任城

王潛為太師丙子降死罪已下囚閏月戊戌錄尚書事
安定王賀拔仁薨三月辛酉以開府儀同三司徐之才
為尚書左僕射夏六月乙酉以廣寧王孝珩為司空甲
辰以皇子恒生故大赦內外百官普進二級九州職人
普進四級己酉詔以開府儀同三司唐邕為尚書右僕
射秋七月癸丑封孝昭皇帝子彥基為城陽王彥康為
定陵王彥忠為梁郡王甲寅以尚書令蘭陵王長恭為
錄尚書事中領軍和士開為尚書令癸亥韎韠遣使朝

貢癸酉以華山王凝為太傅八月辛卯行幸晉陽九月
乙巳立皇子恒為皇太子冬十月辛巳以司空廣寧王
孝珩為司徒以上洛王思宗為司空封蕭莊為梁王戊
子曲降并州死罪已下囚己丑復改威宗景烈皇帝諡
號為顯祖文宣皇帝十二月丁亥車駕至自晉陽詔右
丞相斛律光出晉州道修城戍

二年春正月丁巳詔兼散騎常侍劉儁使於陳戊寅以
百濟王餘昌為使持節都督東青州刺史二月壬寅以

錄尚書事蘭陵王長恭為太尉并省錄尚書事趙彥深
為司空尚書令和士開為錄尚書事左僕射徐之才為
尚書令右僕射唐邕為左僕射吏部尚書馮子琮為右
僕射夏四月壬午以大司馬琅邪王儼為太保甲午陳
遣使連和謀伐周朝議弗許六月段韶攻周汾州克之
獲刺史楊敷秋七月庚午太保琅邪王儼矯詔殺錄尚
書事和士開於南臺即日誅領軍大將軍庫狄伏連治
書侍御史王子宣等尚書右僕射馮子琮賜死殿中八

月己亥行幸晉陽九月辛亥以太師任城王潛為太宰
馮翊王潤為太師己未左丞相平原王段韶薨戊午曲
降并州界內死罪已下有差庚午殺太保琅邪王儼壬
申陳人來聘冬十月罷京畿府入領軍府己亥車駕至
自晉陽十一月庚戌詔侍中赫連子悅使於周丙寅以
徐州行臺廣寧王孝珩為錄尚書事庚午以錄尚書事
廣寧王孝珩為司徒癸酉以右丞相斛律光為左丞相
三年春正月己巳親祀南郊辛亥追贈故琅邪王儼為

楚帝二月己卯以衛菩薩為太尉辛巳以并省吏部尚書高元海為尚書右僕射庚寅以左僕射唐邕為尚書令侍中祖珽為左僕射是月勅撰元洲苑御覽復改名聖壽堂御覽三月辛酉詔文武官五品以上各舉一人是月周誅冢宰宇文護夏四月周人來聘秋七月戊辰誅左丞相咸陽王斛律光及其弟幽州行臺荊山公豐樂八月庚寅廢皇后斛律氏為庶人以太宰任城王湝為右丞相太師馮翊王潤為太尉蘭陵王長恭為大司

馬廣寧王孝珩為大將軍安德王延宗為司徒使領軍
封輔相聘于周戊子拜右昭儀胡氏為皇后己丑以司
州牧北平王仁堅為尚書令特進許李良為左僕射彭
城王寶德為右僕射癸巳行幸晉陽是月聖壽堂御覽
成勅付史閣復改為修文殿御覽九月陳人來聘冬十
月降死罪己下囚甲午拜弘德夫人穆氏為左皇后大
赦十二月辛丑廢皇后胡氏為庶人是歲新羅百濟勿
吉突厥並遣使朝貢於周為建德元年

四年春正月戊寅以并省尚書令高阿那肱為錄尚書
事庚辰詔兼散騎常侍崔象使於陳是月鄴都并州並
有狐媚多截人髮二月乙巳拜左皇后穆氏為皇后丙
午置文林館乙卯以尚書令北平王仁堅為錄尚書事
丁巳行幸晉陽是月周人來聘三月辛未盜入信州殺
刺史和士休南兖州刺史鮮于世榮討之庚辰車駕至
晉陽夏四月戊午以大司馬蘭陵王長恭為太保大將
軍定州刺史南陽王綽為大司馬太尉衛菩薩為大將

軍司徒安德王延宗為太尉司空武興王普為司徒開
府儀同三司宜陽王趙彥深為司空癸丑祈皇祠壇壝
絕之內忽有車軌之轍案驗傍無人跡不知車所從來
乙卯詔以為大慶班告天下己未周人來聘五月丙子
詔史官更撰魏書癸巳以領軍穆提婆為尚書左僕射
以侍中中書監段孝言為右僕射是月開府儀同三司
尉破胡長孫洪畧等與陳將吳明徹戰於呂梁南大敗
破胡走以免洪畧戰歿遂陷秦涇二州明徹進陷和合

二州是月殺太保蘭陵王長恭六月明徹進軍圍壽陽
壬子幸南苑從官賜死者六十人以錄尚書事高阿那
肱為司徒丙辰詔開府王師羅使於周秋九月校獵于
鄴東冬十月陳將吳明徹陷壽陽辛丑殺侍中崔季舒
張彫虎散騎常侍劉逖封孝琰黃門侍郎裴澤郭遵癸
卯行幸晉陽十二月戊寅以司徒高阿那肱為右丞相
是歲高麗靺鞨並遣使朝貢突厥使來求婚

五年春正月乙丑置左右娥英各一人二月乙未車駕

至自晉陽朔州行臺南安王思好反辛丑行幸晉陽尚書令唐邕等大破思好思好投火死焚其尸並其妻李氏丁未車駕至自晉陽甲寅以尚書令唐邕為錄尚書事夏五月大旱晉陽得死魃長二尺面頂各二目帝聞之使刻木為其形以獻庚申大赦丁亥陳人寇淮北秋八月癸卯行幸晉陽甲辰以高勣為尚書右僕射是歲殺南陽王綽

六年春三月乙亥車駕至自晉陽丁丑烹妖賊鄭子饒

於都市是月周人來聘夏四月庚子以中書監陽休之
為尚書右僕射癸卯靺鞨遣使朝貢秋七月甲戌行幸
晉陽八月丁酉冀定趙幽滄瀛六州大水是月周師入
洛川屯芒山攻逼洛城縱火船焚浮橋河橋絕閏月己
丑遣右丞相高阿那肱自晉陽禦之師次河陽周師夜
遁庚辰以司空趙彥深為司徒斛律阿列羅為司空辛
巳以軍國資用不足稅關市舟車山澤鹽鐵店肆輕重
各有差開酒禁

七年春正月壬辰詔去秋已來水潦人饑不自立者所
在付大寺及諸富戶濟其性命甲寅大赦乙卯車駕至
自晉陽二月辛酉括雜戶女年二十已下十四已上未
嫁者悉集省隱匿者家長處死刑二月丙寅風從西北
起發屋拔樹五日乃止夏六月戊申朔日有蝕之庚申
司徒趙彥深薨秋七月丁丑大雨霖是月以水滂遣使
巡撫流亡人戶八月丁卯行幸晉陽雉集於御座獲之
有司不敢以聞詔營邯鄲宮冬十月丙辰帝大狩於祁

連池周師攻晉州癸亥帝還晉陽甲子出兵大集晉祠
庚午帝發晉陽癸酉帝列陣而行上雞栖原與周齊王
憲相對至夜不戰周師斂陣而退十一月周武帝退還
長安留偏師守晉州高阿那肱等圍晉州城戊寅帝至
圍所十二月戊申周武帝來救晉州庚戌戰于城南我
軍大敗帝棄軍先還癸丑入晉陽憂懼不知所之甲寅
大赦帝謂朝臣曰周師甚盛若何羣臣咸曰天命未改
一得一失自古皆然宜停百賦安朝野收遺兵背城死

戰以存社稷帝意猶豫欲向北朔州乃留安德王延宗
廣寧王孝珩等守晉陽若晉陽不守即欲奔突厥羣臣
皆曰不可帝不從其言開府儀同三司賀拔伏恩封輔
相慕容鍾葵等宿衛近臣三十餘人西奔周師乙卯詔
募兵遣安德王延宗為左廣廣寧王孝珩為右廣延宗
入見帝帝欲向北朔州延宗泣諫不從帝密遣王康德
與中人齊紹等送皇太后皇太子於北朔州丙辰帝幸
城南軍營勞將士其夜欲遁諸將不從丁巳大赦改武

平七年為隆化元年其日穆提婆降周詔除安德王延宗為相國委以備禦延宗流涕受命帝乃夜斬五龍門而出欲走突厥從官多散領軍梅勝郎叩馬諫乃迴之鄴時唯高阿那肱等十餘騎廣寧王孝珩襄城王彥道續至得數十人同行戊午延宗從衆議即皇帝位於晉陽改隆化為德昌元年庚申帝入鄴辛酉延宗與周師戰於晉陽大敗為周師所虜帝遣募人重加官賞雖有此言而竟不出物廣寧王孝珩奏請出宮人及珍寶班

賜將士帝不悅斛律孝卿居中受委帶甲以處分請帝親勞為帝撰辭且曰宜慷慨流涕感激人心帝既出臨衆將令之不復記所受言遂大笑左右亦羣咤將士莫不解體於是自大丞相已下太宰大司馬三師大將軍三公等官並增員而授或三或四不可勝數甲子皇太后從北道至引文武一品以上入朱華門賜酒食及紙筆問以禦周之方畧羣臣各異議帝莫知所從又引高元海宋士素盧思道李德林等欲議禪位皇太子先是

望氣者言當有革易於是依天統故事授位幼主

幼主名恒帝之長子也母曰穆皇后武平元年六月生於鄴其年十月立為皇太子隆化二年春正月乙亥即皇帝位時年八歲改元為承光元年大赦尊皇太后為太皇太后帝為太上皇帝后為太上皇后於是黃門侍郎顏之推中書侍郎薛道衡侍中陳德信等勸太上皇帝往河外募兵更為經畧若不濟南投陳國從之丁丑太皇太后太上皇自鄴先趣濟州周師漸逼癸未幼主

又自鄴東走己丑周師至紫陌橋癸巳燒城西門太上皇將百餘騎東走乙亥度河入濟州其日幼主禪位於大丞相任城王潛令侍中斛律孝卿送禪文及璽綬於瀛州孝卿乃以之歸周又為任城王詔尊太上皇為無上皇幼主為守國天王留太皇太后濟州遣高阿那肱留守太上皇并皇后攜幼主走青州韓長鸞鄧顥等數十人從太上皇既至青州即為入陳之計而高阿那肱召周軍約生致齊主而屢使人告言賊軍在遠己令人

燒斷橋道太上所以停緩周軍奄至青州太上窘急將
遜於陳置金囊於鞍後與長鸞淑妃等十數騎至青州
南鄧村為周將尉遲綱所獲送鄴周武帝與抗賓主禮
并太后幼主諸王俱送長安封帝溫國公至建德七年
誣與宜州刺史穆提婆謀反及延宗等數十人無少長
咸賜死神武子孫所存者一二而已大象末陽休之陳
德信等啓大丞相隋公請收葬聽之葬於長安北原洪
瀆川帝幼而令善及長頗學綴文置文林館引諸文士

焉而言語澁訥無志度不喜見朝士自非寵私昵狎未嘗交語性悞不耐人視有即忿責遇其怒時雖三公令錄奏事莫敢仰視皆畧陳大旨驚走而出每災異寇盜水旱亦不自貶損唯諸處設齋以此為修德雅信巫覡解禱無方初琅邪王舉兵入告者誤云庫狄伏連反帝曰此必仁威也又斛律光死後諸武官舉高思好堪大將軍帝曰思好喜反皆如所言遂自以策無遺算乃益驕縱盛為無愁之曲帝自彈琵琶而唱之侍和之者以

百數人間謂之無愁天子嘗出見羣屬盡殺之或殺人剝面皮而視之任陸令萱和士開高阿那肱穆提婆韓長鸞等宰制天下陳德信鄧長顓何洪珍參豫機權各引親黨超居非次官由財進獄以賄成其所以亂政害人難以備載諸官奴婢閹人商人胡戶雜戶歌舞人見鬼人濫得富貴者將以萬數庶姓封王者百數不復可紀開府千餘儀同無數領軍一時三十連判文書各作花字不具姓名莫知誰也諸貴寵祖禰追贈官歲一進

位極乃止宮掖婢皆封郡君宮女寶衣玉食者五百餘人一裙直萬疋鏡臺直千金競為變巧朝衣夕弊承武成之奢麗以為帝王當然乃更增益宮苑造偃武修文臺其嬪嬙諸院中起鏡殿寶殿瑋瑁殿丹青雕刻妙極當時又於晉陽起十二院壯麗逾於鄴下所愛不恒數毀而又復夜則以火照作寒則以湯為泥百工困窮無時休息鑿晉陽西山為大佛像一夜燃油萬盆光照宮內又為胡昭儀起大慈寺未成改為穆皇后大寶林寺

窮極工巧運石填泉勞費億計人牛死者不可勝紀御馬則籍以糴廩食物有十餘種將合牝牡則設青廬具牢饌而親觀之狗則飼以梁肉馬及鷹犬皆有儀同郡君之號故有赤彪儀同逍遙郡君陵霄郡君高思好書所謂駁龍逍遙者也犬於馬上設褥以抱之鬪雞亦號開府犬馬雞鷹多食縣幹鷹之入養者稍割犬肉以飼之至數日乃死又於華林園立貧窮村舍帝自弊衣為丐食兒又為窮兒之市躬自交易嘗築西鄙諸城使人

衣黑衣為羌兵鼓譟陵之親率內參臨拒或實彎弓射人自晉陽東巡單馬馳驚衣解髮散而歸又好不急之務曾一夜索蠋及旦得三升特愛非時之物取求火急皆須朝徵夕辦當勢者因之貸一而責十焉賦斂日重徭役日煩人力既殫帑藏空竭乃賜諸佞幸賣官或得郡兩三或得縣六七各分州郡下逮鄉官亦多降中者故有勅用州主簿勅用郡功曹於是州縣職司多出富商大賈競為貪縱人不聊生爰自鄴都及諸州郡所在

徵稅百端俱起凡此諸役皆漸於武成至帝而增廣焉
然未嘗有帷薄淫穢唯此事頗優於武成云初河清末
武成夢大蜚攻破鄴城故索境內蜚膏以絕之識者以
後主名聲與蜚相協亡齊之徵也又婦人皆翦剔以著
假髻而危邪之狀有如飛鳥至於南面則髻心正西始
自宮內為之後乃被於四遠天意若曰元首翦落危側
當走西也又為刀子者刀皆狹細名曰盡勢遊童戲者
好以兩手持繩拂地而却上跳且唱曰高末高末之言

蓋高氏運祚之末也然則亂亡之數蓋有兆云

後主武平七年周師至則以七年為隆化元年而
國人立安德王延宗改元德昌後主復傳位於幼
主改元承光後主即位七年

右北齊自文宣帝至後主五帝凡二十八年為
周所滅

通志卷十六

欽定四庫全書

史部
通志卷十七

詳校官侍讀_臣陳萬青

編修_臣裴謙覆勘

覆校官助教_臣金學詩

校對官典簿_臣劉光第

謄錄監生_臣陸鼎

欽定四庫全書

通志卷十七

宋 右迪功郎鄭樵 漁仲 撰

後周紀第十七

文帝 孝閔帝 明帝 武帝 宣帝 靜帝

周太祖文皇帝姓宇文氏諱泰字黑獺代郡武川人也其先出自炎帝炎帝為黃帝所滅子孫遁居朔野其後有葛鳥免者雄武多算略鮮卑奉以為主遂總十二部

落世為大人及其裔孫曰普回因狩得玉璽三紐文曰
皇帝璽普回以為天授已獨異之其俗謂天子曰宇文
故國號宇文并以為氏普回子莫那自陰山南徙始居
遼西是曰獻侯為魏舅甥之國自莫那九世至侯歸豆
為慕容晃所滅其子陵仕燕拜駙馬都尉封元菟公及
慕容寶敗歸魏拜都牧主賜爵安定侯天興初魏遷豪
傑於代都陵隨例徙居武川即為其郡縣人焉陵生系
系生韜韜生皇考肱並以武略稱肱任俠有氣幹正光

末沃野鎮人破六韓拔陵作亂其偽署王衛可瓌最盛
肱乃糾合鄉里斬瓌其衆乃散後陷鮮于修禮為定州
軍所破戰沒於陣武成初追諡曰德皇帝帝德皇帝之
少子也母曰王氏初孕五月夜夢抱子升天纔不至而
止寤以告德皇帝德皇帝喜曰雖不至天貴亦極矣帝
生而有黑氣如蓋下覆其身及長身長八尺方額廣額
美鬚髯髮長委地垂手過膝背有黑子宛轉若龍盤之
形面色紫光人望而敬畏之少有大度不事家人生業

輕財好施以交結賢士大夫為務隨德皇帝在鮮于修
禮軍及葛榮殺修禮帝時年十八榮任以將帥帝察其
無成謀與諸兄去之計未行會榮滅因隨爾朱榮遷晉
陽榮忌帝兄弟雄傑遂託以他罪誅帝第三兄洛生帝
以家寃自理辭旨慷慨榮感而免之益加敬待始以統
軍從榮征討後以別將從賀拔岳討北海王顥於洛陽
孝莊反正以功封寧都子後從岳入關平万俟醜奴行
原州事時關隴寇亂帝撫以恩信百姓皆喜曰早遇宇

文使君吾等豈從逆亂帝嘗從數騎於野忽聞蕭鼓之音以問從者皆莫之聞意獨異之普泰二年爾朱天光東拒齊神武留弟顯壽鎮長安召秦州刺史侯莫陳悅東下岳知天光必敗欲留悅共圖顯壽計無所出帝謂岳曰今天光尚近悅未必貳心若以此事告之恐其驚懼然悅雖為主將不能制物若先說其衆必人有留心進失爾朱之期退恐人情變動若乘此說悅事無不遂岳大喜即令帝入悅軍說之悅遂與岳襲長安帝輕騎

為前鋒追至華陰擒顯壽及岳為關西大行臺以帝為
左丞領岳府司馬事無巨細皆委決焉齊神武既除爾
朱氏遂專朝政帝請往觀之至并州神武以帝非常人
曰此小兒眼目異將留之帝詭陳忠款具託左右苦求
復命倍道而行行一日而神武乃悔發上驛千里追帝
至關不及而反帝還謂岳曰高歡豈人臣邪逆謀未發
者憚公兄弟耳侯莫陳悅本實庸材亦不為歡忌但為
之備圖之不難今費也頭控弦之騎不下一萬夏州刺

史解拔彌俄突勝兵三千餘人及靈州刺史曹泥並恃
僻遠常懷異望河西流人紇豆陵伊利等戶口富實未
奉朝風今若移軍近隴扼其要害示之以威懷之以德
即可收其士馬以資吾軍西輯氐羌北撫沙塞還軍長
安匡扶魏室此桓文之舉也岳大悅復遣帝詣關請事
密陳其狀魏帝納之加帝武衛將軍還令報岳岳遂引
軍西次平涼岳以夏州隣接寇賊欲求良刺史以鎮之
衆皆舉帝岳曰宇文左丞吾左右手何可廢也沉吟累

日乃從衆議表帝為夏州刺史帝至州伊利望風款附而曹泥猶通使於齊神武魏永熙三年正月賀拔岳欲討曹泥遣都督趙貴至夏州與帝謀帝曰曹泥孤城阻遠未足為憂侯莫陳悅貪而無信是宜先圖也岳不聽遂與悅俱討泥二月至河曲果為悅所害衆散還平涼唯大都督趙貴率部曲收岳屍還營三軍未知所屬諸將以都督寇洛年最長推總兵事洛素無雄略威令不行乃請避位於是趙貴言於衆稱帝英姿雄略若告喪

必來赴難因而奉之大事濟矣諸將皆稱善乃令赫連
達馳至夏州告帝士吏咸泣請留以觀其變帝曰難得
而易失者時也不俟終日者機也今不早赴將恐衆心
自離都督彌姐元進規應悅密圖帝事發斬之帝乃率
帳下輕騎馳赴平涼時齊神武遣長史侯景招引岳衆
帝至安定遇之於傳舍吐哺上馬謂曰賀拔公雖死宇
文泰尚存卿何為者景失色曰我猶箭耳隨人所射者
也景於此還帝至平涼哭岳甚慟將士悲且喜曰宇文

公至無所憂矣齊神武又使景與常侍張華原義寧太守王基勞帝帝不受命與基有舊將留之并欲留景並不屈乃遣之時斛斯椿在帝所曰景人傑也何故放之帝亦悔驛追之不及基亦逃歸言帝雄傑請及其未定滅之神武曰卿不見賀拔侯莫陳乎吾當以計拱手取之及沙苑之敗神武乃始追悔于時魏帝將圖神武聞岳被害遣武衛將軍元毗宣旨勞岳軍追還洛陽毗到平涼會諸將已推帝侯莫陳悅亦被敕追還悅既附神

武不肯應召帝曰悅枉害忠良復不應詔命此國之大賊乃令諸軍戒嚴將討悅及毗還帝表於魏帝辭以高歡至河東侯莫陳悅在永洛首尾受敵乞少停緩帝志在討悅而未測朝旨且衆未集假為此辭因與元毗及諸將刑牲盟誓同獎王室初賀拔岳營河曲軍吏獨行忽見一翁謂曰賀拔雖據此衆終無所成當有一字文家從東北來後必大盛言訖不見至是方驗魏帝因詔帝為大都督即統賀拔岳軍帝乃與悅書責以殺賀拔

岳罪又喻令歸朝悅乃詐為詔書與秦州刺史万俟普
撥令為已援普撥疑之封以呈帝帝表奏之魏帝因問
帝安秦隴計帝請召悅授以內官及處以瓜涼一藩不
然則終致猜虞三月帝進軍至原州衆軍悉集諭以討
悅意士卒莫不懷憤四月引兵上隴留兄子遵為都督
鎮原州帝軍令嚴肅秋毫無犯百姓大悅軍出木狹關
大雪平地二尺帝知悅怯而多猜乃倍道兼行出其不
意悅果疑其左右有異志左右不自安衆遂離貳聞大

軍且至退保略陽留一萬餘人據守永洛帝至圍之城
降帝即輕騎數百趣略陽以臨悅軍其部將皆勸悅退
保上邽時南秦州刺史李弼亦在悅軍間遣使請為內
應其夜悅出軍軍自驚潰將卒或來降帝縱兵奮擊大
破之悅與其子弟及麾下數十騎遁走帝乃命原州都
督遵追悅至牽屯山斬之傳首洛陽帝至上邽悅府庫
財物山積皆以賞士卒毫釐無所取左右竊以一銀甕
歸帝知而罪之即剖賜將士衆大悅齊神武聞關隴剋

捷遣使於帝深相倚結帝拒而不納封神武書以聞時神武已有異志故魏帝深仗於帝仍令帝稍引軍而東帝乃令大都督梁禦率步騎五千將鎮河渭合口為圖河東計魏帝進帝侍中驃騎大將軍開府儀同三司關西大都督略陽縣公承制封拜使持節如故時魏帝方圖齊神武又遣徵兵帝乃令前秦州刺史駱超為大都督率輕騎一千赴洛魏帝進授帝兼尚書左僕射關西大行臺餘官如故帝乃傳檄方鎮暴神武罪惡興兵東

討既而謂諸軍曰高歡雖智不足而詐有餘今聲言欲西其意在入洛吾欲令寇洛率馬步萬餘自涇州東引王羆率甲士一萬先據華州歡若西來王羆足得抗拒如其入洛寇洛即襲汾晉吾便速駕直赴京邑使其進有內顧之憂退有被躡之勢一舉大定此為上策衆咸稱善七月帝帥衆發自高平前軍至于弘農而齊神武稍逼京師魏帝親總六軍屯河橋令左衛元斌之領軍斛斯椿鎮虎牢帝謂左右曰高歡數日行八九百里曉

兵者所忌正須乘便擊之而主上以萬乘之重不能度
河決戰方緣津據守且長河萬里扞禦為難一處得度
大事去矣即以大都督趙貴為別道行臺自蒲坂濟趣
并州遣大都督李賢將精騎一千赴洛陽會斌之與斛
斯椿爭權鎮防不守魏帝遂輕騎入關帝備儀衛奉迎
謁見於東驛免冠流涕謝罪乃奉魏帝都長安拔草萊
立朝廷軍國之政咸取決於帝仍加授大將軍雍州刺
史兼尚書令進封略陽郡公別置二尚書隨機處分解

尚書僕射餘如故初魏帝在洛陽許以馮翊長公主配
帝未及結納而魏帝西遷至是詔帝尚之拜駙馬都尉
八月齊神武襲陷潼關侵華陰帝率諸軍屯霸上以待
之神武留其將薛瑾守關而退帝乃進軍斬瑾虜其卒
七千還長安進位丞相十一月遣儀同李虎與李弼趙
貴等討曹泥於靈州虎引河灌之明年泥降遷其豪帥
于咸陽十二月魏孝武帝崩帝與羣公定冊尊立魏南
陽王寶炬為嗣是為文帝

大統元年正月己酉魏帝進帝都督中外諸軍錄尚書事大行臺改封安定郡王帝固讓王及錄尚書魏帝許之乃改封安定郡公東魏將司馬子如寇潼關帝軍霸上子如乃還軍自蒲津寇華州刺史王羆擊走之三月帝命有司為二十四條新制奏行之

二年五月秦州刺史建忠王万俟普撥率所部入東魏帝輕騎追之至河北千餘里不及而還

三年正月東魏寇龍門屯軍蒲坂造三道浮橋度河又

武不肯應召帝曰悅枉害忠良復不應詔命此國之大賊乃令諸軍戒嚴將討悅及毗還帝表於魏帝辭以高歡至河東侯莫陳悅在永洛首尾受敵乞少停緩帝志在討悅而未測朝旨且衆未集假為此辭因與元毗及諸將刑牲盟誓同獎王室初賀拔岳營河曲軍吏獨行忽見一翁謂曰賀拔雖據此衆終無所成當有一字文家從東北來後必大盛言訖不見至是方驗魏帝因詔帝為大都督即統賀拔岳軍帝乃與悅書責以殺賀拔

岳罪又喻令歸朝悅乃詐為詔書與秦州刺史万俟普
撥令為已援普撥疑之封以呈帝帝表奏之魏帝因問
帝安秦隴計帝請召悅授以內官及處以瓜涼一藩不
然則終致猜虞三月帝進軍至原州衆軍悉集諭以討
悅意士卒莫不懷憤四月引兵上隴留兄子遵為都督
鎮原州帝軍令嚴肅秋毫無犯百姓大悅軍出木狹關
大雪平地二尺帝知悅怯而多猜乃倍道兼行出其不
意悅果疑其左右有異志左右不自安衆遂離貳聞大

軍且至退保略陽留一萬餘人據守永洛帝至圍之城
降帝即輕騎數百趣略陽以臨悅軍其部將皆勸悅退
保上邽時南秦州刺史李弼亦在悅軍間遣使請為內
應其夜悅出軍軍自驚潰將卒或來降帝縱兵奮擊大
破之悅與其子弟及麾下數十騎遁走帝乃命原州都
督遵追悅至牽屯山斬之傳首洛陽帝至上邽悅府庫
財物山積皆以賞士卒毫釐無所取左右竊以一銀甕
歸帝知而罪之即剖賜將士衆大悅齊神武聞關隴剋

捷遣使於帝深相倚結帝拒而不納封神武書以聞時神武已有異志故魏帝深仗於帝仍令帝稍引軍而東帝乃令大都督梁禦率步騎五千將鎮河渭合口為圖河東計魏帝進帝侍中驃騎大將軍開府儀同三司關西大都督略陽縣公承制封拜使持節如故時魏帝方圖齊神武又遣徵兵帝乃令前秦州刺史駱超為大都督率輕騎一千赴洛魏帝進授帝兼尚書左僕射關西大行臺餘官如故帝乃傳檄方鎮暴神武罪惡興兵東

斬六千餘級臨陣降者二萬餘人神武夜遁追至河上
復大剋前後虜其卒七萬留其甲兵二萬餘悉縱歸收
其輜重兵甲獻俘長安李穆曰高歡胆破矣逐之可獲
帝不聽乃還軍渭南時所徵諸州兵始至乃於戰所準
當時兵人種樹一株栽柳七千根以旌武功魏帝進帝
柱國大將軍增邑并前五千戶李弼等十二將亦進爵
增邑以左僕射馮翊王元李海為行臺與開府獨孤信
帥步騎二萬向洛陽賀拔勝李弼度河圍蒲坂蒲坂鎮

將高子信開門納勝軍東魏將薛崇禮棄城走勝等追獲之帝進軍蒲坂畧定汾絳初帝自弘農入關後東魏將高昂圍弘農聞其軍敗退守洛陽獨孤信至新安昂復走度河遂入洛陽自梁陳已西將吏降者相屬於是東魏將堯雄趙育是云寶出潁川欲復降地帝遣儀同宇文貴梁遷等逆擊大破之趙育來降東魏復遣任祥率河南兵與堯雄合儀同怡峯與貴遷等復擊破之又遣都督常孝寬取豫州是云寶殺其東揚州刺史那椿

以州來降

四年三月帝率諸將入朝禮畢還華州七月東魏將侯景等圍獨孤信於洛陽齊神武繼之帝奉魏帝至穀城臨陣斬東魏將莫多婁貸文悉虜其衆送弘農遂進軍瀍東景等夜解圍去及旦帝率輕騎追至河上景等北據河橋南屬芒山為陣與諸軍戰帝馬中流矢驚逸軍中擾亂都督李穆下馬授帝軍復振於是大捷斬其將高昂李猛宋顯等虜其甲士一萬五千人赴河死者萬

數是日置陣既大首尾懸遠從旦至未戰數十合氛霧
四塞莫能相知獨孤信李遠居右趙貴怡峯居左戰並
不利又未知魏帝及帝所在皆棄其卒先歸開府李虎
念賢等為後軍遇信等退即與俱還由是班師洛陽亦
失守大軍至弘農守將皆已棄城西走所虜降卒在弘
農者因相與閉門拒守進攻拔之誅其魁首數百人大
軍之東伐也關中留守兵少而前後所虜東魏士卒皆
散在百姓間乃謀亂及李虎等至長安計無所出乃與

太尉王明僕射周惠達輔魏太子出次渭北關中大震
恐百姓相剽劫於是沙苑所俘軍人趙青雀雍州人于
伏德等遂反青雀據長安子城伏德保咸陽與太守慕容
思度各收降卒以拒還師長安城人皆相率拒青雀
每日接戰魏帝留止閼鄉令帝討之長安父老見帝且
悲且喜曰不意今日復得見公士女咸相賀華州刺史
宇文導襲咸陽斬思度禽伏德南度渭與帝會攻破青雀
太傅梁景獻先以疾留長安遂與青雀通謀至是亦伏

誅關中乃定魏帝還長安帝復屯華州十二月是云寶
襲洛陽東魏將王元軌棄城走都督趙剛襲廣州拔之
自襄廣以西城鎮復西屬

五年冬大閱於華陰

六年春東魏將侯景出三鵠將侵荊州帝遣開府李弼
獨孤信各率騎出武關景乃還夏蠕蠕度河至夏州帝
召諸軍屯沙苑以備之

七年十一月帝奏行十二條制恐百官不勉於職事又

下令申明之

八年十月齊神武侵汾絳圍玉壁帝出軍蒲坂神武退
度汾追之遂遁去十二月魏帝狩於華陰大饗將士帝
帥諸將朝於行在所

九年二月東魏北豫州刺史高慎舉州來附帝帥師迎
之三月齊神武據芒山為陣不進者數日帝留輜重於
澠曲軍士銜枚夜登芒山未明擊之神武單騎為賀拔
勝所逐僅免帝率右軍若干惠大破神武軍悉虜其步

卒趙貴等五將軍居右戰不利神武復合戰帝又不利
夜引還入關屯渭上神武進至陝開府達奚武等禦之
乃退帝以芒山諸將失律上表自貶魏帝不許於是廣
募關隴豪右以增軍旅十月大閱於櫟陽還屯華州
十年五月帝朝京師七月魏帝以帝前後所上二十四
條及十二條新制定為中興永式命尚書蘇綽更損益
之總為五卷班於天下於是搜簡賢才為牧守令習新
制而遣焉數年間百姓便之十月大閱於白水

十一年十月大閱於白水遂西狩岐陽

十二年春涼州刺史宇文仲和據州反瓜州人張保害
刺史成慶以應之帝遣開府獨孤信討之東魏將侯景
侵襄州帝遣開府若干惠禦之至穰景遁去五月獨孤
信平涼州禽仲和遷其百姓六千餘家於長安瓜州都
督令狐延起義誅張保瓜州平七月帝大會諸軍於咸
陽

十三年正月東魏河南大行臺侯景舉河南六州來附

景被圍於潁川六月帝遣開府李弼援之東魏將韓軌等遁去景遂徙鎮豫州於是遣開府王思政據潁川弼引軍還七月侯景密圖附梁帝知其謀悉追還前後所配景將士景懼遂叛冬帝奉魏帝西狩咸陽

十四年春魏帝詔封帝長子覺為寧都郡公初帝以平元顥納孝莊帝功封寧都縣子至是改以為郡以封覺用彰勤王之始也五月魏帝進帝位太師帝奉魏太子巡撫西境登隴刻石紀事遂至原州歷北長城大狩東

趣五原至蒲州聞魏帝不豫而還及至魏帝疾已愈乃還華州是歲東魏將高岳圍王思政於潁川

十五年春帝遣大將軍趙貴帥師援王思政高岳堰洧水以灌城潁川以北皆為陂澤救兵不得至六月潁川陷初侯景圍建鄴梁司州刺史柳仲禮赴臺城梁竟陵郡守孫暉以郡內附帝使大都督苻貴鎮之及建鄴陷仲禮還司州來寇暉以郡叛帝大怒十一月遣開府楊忠攻尅隨州進圍仲禮長史馬岵於安陸

十六年正月仲禮來援安陸楊忠逆擊於滹頭大破之禽仲禮馬岫以城降三月魏帝封帝第二子震為武邑公七月帝東伐拜章武公導為大將軍總督留守諸軍屯涇北鎮關中九月丁巳軍出長安連雨自秋及冬諸軍馬驢多死遂於弘農北造橋濟河自蒲坂還於是河南自洛陽河北自平陽以東遂入齊

十七年三月魏文帝崩皇太子嗣位帝以冢宰總百揆十月帝遣大將軍王雄出于午伐上津魏興大將軍達

奚武出散關伐南鄭

廢帝元年春王雄平上津魏興以其地置東梁州四月
達奚武圍南鄭月餘梁州刺史宜豐侯蕭脩以州降武
八月東梁州百姓圍州城帝復遣王雄討之

二年正月魏帝詔帝為左丞相大行臺都督中外諸軍
事二月東梁州平遷其豪帥於雍州三月帝遣大將軍
魏安公尉遲迴帥師伐梁武陵王蕭紀於蜀四月帝勒
銳騎三萬西踰隴度金城河至姑臧吐谷渾震懼遣使

獻其方物七月帝至自姑臧八月尉遲迥剋成都劍南
平十一月尚書元烈謀亂伏誅

三年正月始作九命之典以叙内外官爵以第一品為
九命第九品為一命改流外品為九秩亦以九為上又
改置州郡縣凡改州四十六置州三改郡一百六改縣
三百三十魏帝有怨言於是帝與公卿議廢帝立齊王
廓是為恭帝

恭帝元年四月帝大饗羣臣魏太史柳虬執簡書告於

朝曰廢帝文皇帝之嗣子年七歲文皇帝託於安定公
曰是子也才由於公不才亦由於公公宜勉之公既受
茲重寄居元輔之任又納女為皇后遂不能訓誨有成
致令廢黜負文皇帝付屬之意此咎非安定公而誰帝
乃令太常盧辨作誥諭公卿曰嗚呼我羣后暨衆士維
文皇帝以襁褓之嗣託於予訓之誨之庶厥有成而予
罔能弗變厥心庸暨乎廢墜我文皇帝之意嗚呼茲咎
予其焉避予實知之矧爾衆人之心哉惟予之顏豈惟

今厚將恐來世以予為口實乙亥魏帝詔封帝子邕為
輔城公憲為安城公七月西狩至原州梁元帝遣使請
據舊圖以定疆界又連結於齊言辭悖慢帝曰古人有
言天之所棄誰能興之其蕭繹之謂乎十月壬戌遣柱
國于謹中山公護與大將軍楊忠常孝寬等步騎五萬
討之十一月癸未師濟漢中山公護與楊忠率銳騎先
屯其城下丙申于謹至江陵列營圍守辛亥剋其城戕
梁元帝虜其百官士庶以歸沒為奴婢者十餘萬免者

二百餘家立蕭譽為梁主居江陵為魏附庸魏氏之初
統國三十六大姓九十九後多絕滅至是以諸將功高
者為三十六國後次者為九十九姓後所統軍人亦改
從其姓

二年梁廣州刺史王琳寇邊十月帝遣大將軍豆盧寧
帥師討之

三年正月丁丑初行周禮建六官魏帝進帝位太師大
冢宰帝以漢魏官繁思革前弊大統中乃令蘓綽盧辨

依周制改創其事尋亦置六卿官然為撰次未成衆務猶歸臺閣至是始畢乃命行之四月帝北巡七月度北河魏帝封帝子直為秦郡公招為正平公九月帝不豫還至雲陽命中山公護受遺輔嗣子十月乙亥帝崩於雲陽宮還長安發喪時年五十二月甲申葬於成陵諡文公及孝閔帝受禪追尊為文王廟曰太祖武成元年追尊為文皇帝帝知人善任使從諫如順流崇尚儒術明達政事恩信被物能駕馭英豪一見之者咸思用

命沙苑所獲囚俘釋而用之及河橋之後以充戰士皆得其死力諸將出征授以方略無不制勝性好朴素不尚虛飾恒以反風俗復古始為心云

孝閔皇帝諱覺字陀羅尼文帝第三子也母曰元皇后大統八年生於同州七歲封略陽郡公時善相者史元華見帝退謂所親曰此公子有至貴相但恨不壽耳魏恭帝三年三月命為安定公世子四月拜大將軍十月乙亥文帝崩丙子世子嗣位為太師大冢宰十二月丁

次魏帝詔以岐陽地封帝為周公庚子詔禪位於帝遣民部中大夫濟北公元迪致皇帝璽綬帝固辭公卿百辟勸進太史陳祥瑞乃從之是日魏帝遜位於大司馬府

元年春正月天王即位柴燎告天朝百官於露門追尊皇考文公為文王皇妣為文后大赦封魏帝為宋公是日槐里獻赤雀百官奏議曰帝王之興罔弗更正朔明受之於天草人視聽也逮於尼父稽諸陰陽云行夏之

時後王所不易今魏歷告終周室受命以木承水實當
行錄正用夏時式遵聖道惟文王誕元氣之祥有黑水
之讖服色宜尚焉制曰可以大司徒趙郡王李弼為太
師以大宗伯南陽公趙貴為太傅大冢宰以大司馬河
內公獨孤信為太保以大宗伯中山公護為大司馬以
大將軍寧都公毓高陽公達奚武武陽公豆盧寧小司
寇陽平公李遠小司馬博陵公賀蘭祥小宗伯魏安公
尉遲迴等並為柱國壬寅祀圓丘詔曰予本自神農其

於二丘宜作厥主始祖獻侯啟土遼海配南北郊文考
德符五運受天明命祀於明堂以配上帝癸卯祀方丘
甲辰遂祭太社初除市門稅乙巳享太廟丁未會於乾
安殿班賞各有差戊申詔有司分命使者巡察風俗求
人得失禮餼高年恤於鰥寡辛亥祀南郊壬子立王后
元氏辛酉享太廟癸亥親耕藉田二月癸酉朔朝日於
東郊戊寅祭太社丁亥柱國楚國公趙貴謀反伏誅太
保獨孤信有罪免甲午以大司空梁國公侯莫陳崇為

太保大司馬晉國公護為大冢宰柱國博陵公賀蘭祥
為大司馬高陽公達奚武為大司寇大將軍化政公宇文
貴為柱國三月己酉衛國公獨孤信賜死癸亥省六
府士員三分之一夏四月壬申降死罪以下囚壬午謁
成陵丁亥享太廟五月己酉帝將觀漁於昆明池博士
姜頊諫乃止秋七月壬寅帝聽訟於右寢多所哀宥辛
亥享太廟八月戊辰祭太社辛未降死罪以下囚甲午
詔二十四軍舉賢良九月庚申改太守為郡守帝性剛

果忌晉公護之專司會李植軍司馬孫恒以先朝佐命
入侍左右亦疾護權重乃與宮伯乙鳳賀拔提等潛請
帝誅護帝許之又引宮伯張先洛先洛以白護護乃出
植為梁州刺史恒為潼州刺史鳳等更奏帝將召羣臣
入因此誅護先洛又白之時小司馬尉綱總統宿衛兵
護乃召綱入殿中詐呼鳳等論事以次執送護第並誅
之綱仍罷禁兵帝無左右獨在內殿令宮人執兵自守
護遣大司馬賀蘭祥逼帝遜位貶為略陽公遂幽於舊

卽月餘日以弑崩時年十六植恒等亦遇害及武帝誅
護後乃詔曰故略陽公至德純粹天姿秀傑屬魏祚告
終寶命將改謳歌允集歷數攸歸上協蒼靈之慶下昭
后祇之錫而禍生肘腋釁起蕭牆白虎噬驂蒼鷹集殿
幽辱神器弑酷乘輿寃結生靈毒流寓縣今河海澄清
氛沴消蕩追尊之禮宜崇徽號遣太師蜀國公廻於南
郊上諡曰孝閔皇帝陵曰靜陵

孝閔帝元年無年號

世宗明皇帝諱毓小名統萬突文皇帝之長子也母曰姚夫人永熙三年文帝臨夏州生於統萬城因以名焉大統十四年封寧都郡公魏恭帝三年累遷大將軍鎮隴右孝閔踐阼進位柱國轉岐州刺史有美政及孝閔廢晉公護遣迎帝於岐州九月癸亥至京師止於舊邸羣臣上表勸進備法駕奉迎帝固讓羣臣固請乃許之元年秋九月天王即位大赦乙丑朝羣臣於延壽殿冬十月癸酉太師趙國公李弼薨己卯以大將軍昌平公

尉綱為柱國乙酉祀圓丘丙戌祀方丘甲午祭太社陽
平公李遠賜死辛未梁敬帝遜位於陳十一月庚子享
太廟丁未祀圓丘十二月庚午謁成陵庚辰以大將軍
輔城公邕為柱國戊子赦長安見囚甲午詔元氏子女
自坐趙貴等事以來所有沒入為官口者悉免之

二年春正月乙未以大冢宰晉公護為太師辛亥親耕
籍田癸丑立王后獨孤氏丁巳於雍州置十二郡三月
甲午北豫州刺史司馬消難舉州來附改雍州刺史為

牧京兆郡守為尹庚申詔三十六國九十九姓自魏南徙皆稱河南人今周室既都關中宜改稱京兆人夏四月己巳以太師晉公護為雍州牧辛未降死罪囚一等五歲刑以下皆原之甲戌天王后獨孤氏崩甲申葬敬后五月乙未以大司空梁國公侯莫陳崇為大宗伯六月癸亥噉噉國遣使朝貢己巳板授高年刺史守令恤鰥寡孤獨各有差分長安為萬年縣並居京城壬申遣使分行州郡理因徒察風俗掩骸埋胔秋七月順陽獻

三足烏八月甲子羣臣上表稱慶於是大赦文武普進
級九月辛卯以大將軍楊忠王雄並為柱國甲辰封少
師元羅為韓國公以紹魏後丁未行幸同州故宅賦詩
冬十月辛酉突厥遣使朝貢癸亥太廟成乙亥以功臣
瑯邪貞獻公賀拔勝等十三人配享文帝廟庭壬午大
赦

武成元年春正月己酉太師晉公護上表歸政帝始親
萬機軍旅猶總於護初改都督諸州軍事為總管三月

癸巳陳六軍帝親擐甲胄迎太白於西方吐谷渾寇邊
庚戌遣大司馬博陵公賀蘭祥率衆討之夏五月戊子
詔有司造周歷已亥聽訟於正武殿辛亥以大宗伯梁
國公侯莫陳崇為大司徒大司寇高陽公達奚武為大
宗伯武陽公豆盧寧為大司寇柱國輔城公邕為大司
空乙卯詔曰比屢有糾發官司赦前事者有司自今勿
推究唯庫廩倉廩與海內所共漢帝有云朕為天下守
財耳若有侵盜公家財畜錢粟者魏朝之事年月既遠

一不須問自周有天下以來雖經赦宥事跡可知者有
司宜即推窮得實之日免其罪徵備如法賀蘭祥攻拔
洮陽洪和二城吐谷渾遁走閏月高昌遣使朝貢六月
戊子大雨霖詔公卿大夫士爰及牧守黎庶等令各上
封事讜言極諫無有所諱其遭水者有司可時巡檢條
列以聞庚子詔曰潁川從我是曰元勲無忘父城實起
王業皇考文王屬天地草昧造化權輿拯彼流亡匡茲
頽運賴英賢盡力文武同心翼贊大功克隆帝業而被

堅執銳櫛風沐雨永言疇昔良用憮然若功名遂建
國割符予唯休也其有致死王事妻子無歸者朕甚傷
之凡從先王向夏州發夏州從來見在及薨亡者並量
賜錢帛稱朕意焉是月陳武帝殂秋八月己亥改天王
稱皇帝追尊文王為文皇帝大赦改元癸丑增御正四
人位上大夫冬十月齊文宣帝殂

二年春正月癸丑朔大會羣臣於紫極殿始用百戲三
月辛酉重陽閣成會羣臣公侯列將卿大夫及突厥使

於芳林園賜錢帛各有差夏四月帝因食糖粳遇毒庚
子大漸詔曰人生天地之間稟五常之氣天地有窮已
五常有推移人安得長在是以有生有死者物理之必
然處必然之理修短之間何足多恨朕雖不德性好典
墳披覽聖賢餘論未嘗不以此自曉今乃命也夫復何
言諸公及在朝卿大夫士軍中大小督將軍人等並立
勲効積有年載輔翼太祖成我周家今朕纘承大業處
萬乘之上此上不負太祖下不負朕躬朕得啟手啟足

從先帝於地下實無恨於心矣所可恨者朕享大位可謂四年矣不能使政化修理黎庶豐足九州未一二方猶梗顧此恨恨目用不瞑唯冀仁兄冢宰洎朕先正先父公卿大臣等協和為心勉力相勸勿忘太祖遺志提挈後人朕雖沒九泉形骸不朽今大位虛曠社稷無主朕兒幼少未堪當國魯國公邕朕之介弟寬仁大度海內共聞能弘我周家必此子也夫人貴有始終公等事太祖輔朕躬可謂有始矣若克念政道顧其艱難輔邕

以主天下者可謂有終矣哀死事生人臣大節公等可
思念此言令萬代稱歎朕稟生儉素非能力行菲薄每
寢大布之被服大帛之衣凡是器用皆無雕刻身終之
日豈容違棄此好喪事所須務從儉約歛以時服勿使
有金玉之飾若以禮不可闕皆令用瓦小歛訖七日哭
文武百官各權辟麻苴以素服從事葬日選擇不毛之
地因勢為墳勿封勿樹且厚葬傷生聖人所誡既服膺
聖人之教安敢違之凡百官司勿異朕意四方州鎮使

到各令三日哭哭訖權辟凶服還以素服從事待大例
除非有呼召各按部自守不得輒奔赴闕庭禮有通塞
隨時之義葬訖內外悉除服從吉三年之內勿禁婚娶
一令如平常也時事殷猥病困心亂止能及此如事有
不盡準此以類為斷死而可忍古人有之朕今忍死盡
此懷抱其詔即帝口授也辛丑帝崩於延壽殿時年二
十七諡曰明皇帝廟號世宗五月辛未葬於昭陵帝寬
明仁厚敦睦九族有君人之量幼而好學博覽羣書善

屬文詞彩溫麗及即位集公卿已下有文學者八十餘人於麟趾殿刊校經史又摭採衆書自羲農已來訖于魏末叙為世譜凡百卷所著文章十卷

明帝初即位二年不稱年號後改武成盡二年即位四年

高祖武皇帝諱邕字彌羅突文帝第四子也母曰叱奴太后魏大統九年生於同州有神光照室帝幼而孝敬聰敏有器質文帝異之曰成吾志者此兒也年十二封

輔城郡公孝閔帝踐阼拜大將軍出鎮同州明帝即位
遷柱國授蒲州刺史入為大司空行御正進封魯國公
領宗師甚見親愛參議朝廷大事性沉深有遠識非因
問終無所言帝每歎曰夫人不言言必有中武成二年
四月帝崩遺詔傳位於帝帝固讓百官勸進乃從之壬
寅即皇帝位大赦冬十二月改作露門是歲齊孝昭帝
廢其主殷而自立

保定元年春正月戊申改元文武百官各增四級以大

冢宰晉公護為都督中外諸軍事令五府總於天官庚戌祀圓丘壬子祀方丘甲寅祀感生帝於南郊乙卯祭太社己巳享太廟班文帝所述六官於廟廷甲戌板授高年官各有差乙亥親耕籍田丙子大射於正武殿賜百官各有差二月己卯遣大使巡察天下風俗甲午朝日於東郊丙午省輦輿去百戲三月丙寅改八丁兵為十二丁兵率歲一月役夏四月丙子朔日有蝕之庚寅以少傅吳公尉綱為大司空丁酉白蘭遣使獻犀甲鐵

鎧五月丙午封孝閔皇帝子康為紀國公皇子贊為魯國公晉公護獲玉斗以獻六月乙酉遣御正殷不害使於陳秋七月戊申以旱故詔所在降死罪以下囚更鑄錢文曰布泉以一當五與五銖並行九月甲辰南寧州使獻滇馬及蜀鎧冬十月甲戌朔日有蝕之十一月乙巳陳人來聘丁巳狩於岐陽是月齊孝昭帝殂十二月車駕至自岐陽是歲突厥吐谷渾高昌宕昌龜茲等國並遣使朝貢

二年春正月壬寅初於蒲州開河渠同州開龍首渠以
廣溉灌丁未以陳主弟頊為柱國送還江南閏月己亥
大司馬涼公賀蘭祥薨二月癸丑以久不雨宥罪人京
城三十里內禁酒梁主蕭譽薨夏四月甲辰以旱故禁
屠宰癸亥詔曰諸柱國等勲德隆重宜有優崇各準別
制邑戶聽寄食他縣五月庚午以南山衆瑞並集免今
年役及租賦之半壬辰以柱國隋公楊忠為大司空六
月己亥以柱國蜀公尉遲迥為大司馬分山南荊州安

州襄州江陵為四總管秋九月戊辰朔日有蝕之陳人來聘冬十月辛亥帝御大武殿大射戊午講武於少陵原十一月丁卯以大將軍衛公直趙公招並為柱國

三年春正月辛未改光遷國為遷州乙酉太保梁公侯莫陳崇暘死二月庚子初頒新律辛酉詔自今舉大事行大政非軍機急速皆依月令以順天心三月乙丑朔日有蝕之丙子宕昌國獻生猛虎二詔放之南山夏四月乙未以柱國鄭公達奚武為太保大將軍韓果為柱

國已亥帝御正武殿錄囚徒癸卯大雩癸丑有牛足生
於背戊午幸太學以太傅燕公于謹為三老而問道焉
初禁天下報讎犯者以殺人論壬戌詔百官及庶人上
封事極言得失五月甲午朔以旱故避正寢不受朝甲
戌雨秋七月戊辰行幸原州庚午陳人來聘丁丑幸津
門問百年賜以金帛又賜高年板職名有差降死罪囚
一等八月丁未改作露寢九月甲子自原州登隴山丙
戌幸同州戊子詔柱國楊忠率騎一萬與突厥伐齊已

丑初令世襲州郡縣者悉改為五等爵州封伯郡封子
縣封男冬十月庚戌陳人來聘十二月辛卯車駕至自
同州遣太保達奚武率騎三萬出平陽以應楊忠是月
有人生子男而陰在背後如尾兩足指如虎爪有犬生
子腰以後分為二身兩尾六足

四年春正月庚申楊忠破齊長城至晉陽而還二月庚
寅朔日有蝕之三月庚辰初令百官執笏夏四月癸卯
以柱國鄧公竇熾為大宗伯五月壬戌封明帝長子賢

為畢公癸酉以大將軍安武公李穆為柱國丁亥改禮部為司宗大司禮為禮部大司樂為樂部六月庚寅改御伯為納言秋七月焉耆國遣使獻名馬八月丁亥朔日有蝕之詔柱國楊忠師師與突厥東伐至北河而還戊子以柱國齊公憲為雍州牧以許公宇文貴為大司徒九月丁巳以柱國衛公直為大司空陳人來聘是月以皇世母閭氏自齊至大赦閏月己亥以大將軍常孝寬長孫儉並為柱國冬十月癸亥以大將軍陸通宇文

盛蔡公廣並為柱國甲子詔大冢宰晉公護伐齊齊於太廟庭授以斧鉞於是護總大軍出潼關大將軍權景宣帥山南諸軍出豫州少師楊勰出軹關丁卯帝幸沙苑勞師癸酉還宮十一月甲午柱國尉遲迴圍洛陽柱國齊公憲營芒山晉公護次陝州十二月丙辰齊豫州刺史王士良以州降壬戌齊師度河晨至洛陽諸軍驚散尉遲迴帥麾下數十騎扞敵得却至夜引還柱國王雄力戰死之遂班師楊勰於軹關戰沒權景宣亦棄豫

州而還是歲突厥粟特等國並遣使朝貢

五年春正月甲申朔以柱國王雄死王事故廢朝乙巳以雄世子謙為柱國二月辛丑詔陳公純等逆皇后于突厥丙寅以柱國李穆為大司空綏德公陸通為大司寇壬申行幸岐州戊子柱國豆盧寧薨夏四月齊武成帝禪位於其太子緯自稱太上皇帝五月己亥左右武伯各置中大夫一人六月庚申彗星出三台入文昌犯上將經紫宮入苑漸長丈餘百餘日乃滅辛未詔江陵

人年六十已上為官奴婢者已令放免其公私奴婢年七十以外者所在官司宜贖為庶人秋七月辛巳朔日有蝕之庚寅行幸秦州降死罪已下刑辛丑遣大使巡察天下八月丙子車駕至自秦州冬十月辛亥改函谷關城為通洛防十一月丁未陳人來聘是歲吐谷渾遣使朝貢

天和元年春正月己卯朔日有蝕之辛巳考露寢命群臣賦古詩京邑耆老亦會焉頒賜各有差癸未大赦改

元百官普加四級已亥親耕籍田丁未於宕昌國置宕
州遣小載師杜果使於陳二月戊辰詔三公已下各舉
所知庚午日闕光遂微日中見烏三月丙午祀南郊夏
四月辛亥雩是月陳文帝殂五月庚辰帝御正武殿集
羣臣親講禮記吐谷渾龍涸王莫昌率戶內附以其地
為扶州甲午詔自今甲子乙卯日依古禮停樂六月庚
午以大將軍辛威為柱國秋七月戊寅築武功郿斜谷
武都留谷津阬諸城以置軍人壬午詔諸曹子入學但

束修於師不勞釋奠釋奠者學成之祭自今即為恒式
八月己未詔諸有三年之喪或負土成墳或寢苦骨立
一志一行可稱揚者本部官司隨事上言當加弔勉以
勵薄俗九月乙亥信州蠻反詔開府陸騰討平之冬十
月甲子初造山雲儼以備六代樂十一月丙戌行幸武
功等城十二月庚申還宮

二年春正月癸酉朔日有蝕之己亥親耕籍田三月癸
酉改武遊園為道會苑丁亥初立郊丘壇壝制度夏四

月乙巳省併東南諸州以大將軍陳公純為柱國六月
辛亥尊所生叱奴氏為皇太后閏月庚午地震戊寅陳
湘州刺史華皎帥衆來附壬辰以大將軍譙公儉為柱
國秋七月辛丑梁州上言鳳凰集楓樹羣鳥列侍以萬
數甲辰立露門學置生員七十二人壬子以太傅燕公
于謹為雍州牧九月衛公直等與陳將淳于量吳明徹
戰于沌口王師敗績元定以步騎數千先度遂沒江南
冬十一月戊戌朔日有蝕之癸丑太保許國公宇文貴

薨是歲突厥吐谷渾安息等國並遣使朝貢

三年春正月辛丑祀南郊三月癸卯皇后阿史那氏至
自突厥甲辰大赦丁未大會百僚及賓客於露寢戊午
太傅燕公于謹薨夏四月辛巳以太保達奚武為太尉
大司馬尉遲迴為太保柱國齊公憲為大司馬五月庚
戌享太廟六月甲戌有星孛於東井秋七月壬寅柱國
隋公楊忠薨八月乙丑韓公元羅薨齊人來聘請和親
詔軍司馬陸逞報聘癸酉帝御大德殿集百僚及沙門

道士等親講禮記冬十月癸亥享太廟丁亥上親帥六軍講武於城南京邑觀者輿馬彌漫數十里諸蕃使咸在焉十一月壬辰朔日有蝕之壬子遣開府崔彥穆使於齊甲寅陳安成王頊廢其主伯宗而自立辛未齊武成帝殂

四年春正月辛卯朔以齊武成殂故廢朝遣司會李綸等會葬於齊二月戊辰帝御大德殿集百僚道士沙門等討論釋老夏四月己巳齊人來聘五月己丑帝製象

經成集百僚講說封魏廣平公子元謙為韓國公以紹
魏後丁巳柱國吳公尉綱薨六月築原州及涇州東城
秋七月突厥遣使獻馬柱國昌寧公長孫儉薨

五年春三月甲辰初令宿衛官住關外者將家累入京
不樂者解宿衛夏四月甲寅以柱國宇文盛為大宗伯
省帥都督官丙寅遣大使巡察天下六月丙子以皇女
生故降宥罪人并免逋租懸調冬十月辛巳朔日有蝕
之丁酉太傅鄭公達薨武彙十一月丁卯柱國幽公廣

堯十二月癸巳大將軍鄭恪帥師平越舊置西寧州是月齊將斛律光侵遼於汾北築城自華谷至龍門

六年春正月己酉朔以露門未成故廢朝丁卯以大將軍王傑譚公會鴈門公田弘魏公李暉等並為柱國三月己酉齊公憲自龍門度河斛律光退保華谷憲攻拔其新築五城夏四月戊寅朔日有蝕之辛卯信州蠻反遣大將軍趙閭帥師討平之庚子以大將軍司馬消難侯莫陳瓊大安公閭慶神武公竇毅南陽公叱羅協平

高公侯伏侯龍恩並為柱國五月癸亥遣納言鄭諍使
於陳丙寅以大將軍李虎中山公訓杞公亮上庸公陸
騰安義公宇文邕北平公冠紹許公宇文善犍為公高
琳鄭公達奚震隴東公楊纂常山公于翼並為柱國六
月乙未以大將軍太原公王秉為柱國是月齊將段孝
先攻陷汾州秋七月乙丑以大將軍越公盛為柱國八
月癸酉省掖庭四夷樂後宮羅綺工五百餘人冬十月
壬午冀公通薨乙未遣右武伯谷會琨使於齊壬寅上

親帥六軍講武於城南十一月壬子以大將軍梁公侯
莫陳芮大將軍李意並為柱國丙辰齊人來聘丁巳行
幸散關十二月己丑還宮是冬牛疫者十六七

建德元年春正月戊午帝幸元都觀親御法座講說公
卿道俗論難事畢還宮降死罪及流罪一等其五歲刑
已下並宥之二月癸酉遣大將軍昌城公深使於突厥
司宗李際使於齊乙酉柱國安義公宇文邕薨三月癸
卯朔日有蝕之齊人來聘丙辰誅大冢宰晉公護及其

子柱國譚公會并柱國侯伏侯龍恩及其弟大將軍萬壽大將軍劉勇等大赦改元罷中外府癸亥以太傅尉遲迴為太師柱國竇熾為太傅大司空李穆為太保齊公憲為大冢宰衛公直為大司徒趙公招為大司空柱國辛威為大司寇綏德公陸通為大司馬詔曰人勞不止則星動於天作事不時則石言於國頃興造無度徵發不已加以頻歲師旅農畝廢業去秋災蝗年穀不登自今正調以外無妄徵發夏四月甲戌以代公達滕公

適並為柱國己卯詔公卿已下各舉所知遣工部代公
達使於齊丙戌詔百官軍人上封事極言得失丁亥詔
斷四方非常貢獻庚寅追尊略陽公為孝閔皇帝癸巳
立魯公贊為皇太子大赦百官各加封級五月壬戌以
大旱集百官於庭詔之曰亢陽不雨豈朕德薄刑賞乖
中歟將公卿大臣或非其人歟宜盡直言無有所隱公
卿各引咎自責其夜澍雨六月庚子改置宿衛官員秋
七月辛丑陳人來聘九月庚子朔日有蝕之庚申扶風

掘地得玉盃以獻冬十月庚午詔江陵所獲俘虜充官
口者悉免為百姓辛未遣小匠師楊總使於陳大司馬
綏德公陸通薨十一月丙午上親御六軍講武于城南
庚戌行幸羌橋集京城東諸軍都督以上頒賜各有差
乙卯還宮壬戌以大司空趙公招為大司馬十二月壬
申行幸斜谷集京城以西諸軍都督以上頒賜有差丙
戌還宮己丑帝御正武殿親錄囚徒至夜而罷庚寅幸
道會苑以上善殿壯麗遂焚之

二年春正月辛丑祀南郊乙巳以柱國田弘為大司空
大將軍若干鳳為柱國庚戌復置帥都督官乙卯享太
廟閏月己巳陳人來聘二月甲寅詔皇太子贊巡撫西
土壬戌遣司會侯莫陳凱使於齊省雍州內八部併入
京兆馮翊扶風咸陽等郡三月己卯皇太子於岐州獲
白鹿二以獻詔答曰在德不在瑞癸巳省六府諸司中
大夫以下官府置四司以下大夫為官之長上士貳之
夏四月己亥享太廟丙辰增改東宮官員五月丁丑以

柱國侯莫陳瓊為大宗伯滎陽公司馬消難為大司寇
上庸公陸騰為大司空六月庚子省六府員外諸官皆
為丞士子皇孫衍生文武官普加一級大階大選諸軍
將帥丙辰帝御露寢集諸軍將勗以戎事庚申詔諸軍
旗旌皆畫以猛虎鷲鳥之象秋七月己巳享太廟自春
未不雨至於是月壬申集百僚於大德殿帝責躬罪已
問以時政得失戊子雨八月丙午改三夫人為三妃關
中大蝗九月乙丑陳人來聘戊寅詔曰頃者婚嫁競為

奢靡有司宜加宣勅使遵禮制冬十月癸卯齊人來聘
甲辰奏六代樂成帝御崇信殿集百官觀之十一月辛
巳帝親帥六軍講武於城東癸未集諸軍都督以上五
十人於道會苑大射帝親臨射堂大備軍容十二月癸
巳集群官及沙門道士等帝升高座辨釋三教先後以
儒教為先道教次之佛教為後以大將軍赫連達為柱
國詔軍民之間年多耆壽可頒授老職使榮沾邑里戊
午聽訟於正武殿自旦及夜繼之以燭

三年春正月壬戌朝羣臣於露門冊柱國齊公憲衛公直趙公招譙公儉陳公純越公盛代公達滕公道並進爵為王己巳享太廟庚午突厥遣使獻馬癸酉詔自今男年十五女年十三以上爰及鰥寡所在以時嫁娶務從節儉乙亥親耕籍田丙子初服短衣享二十四軍督將以下試以軍旅之法縱酒盡歡詔以往歲年穀不登令公私道俗凡有貯積粟麥者皆準口聽留已外盡糶二月壬辰朔日有蝕之丁酉紀公康畢公賢鄴公貞宋

公實漢公贊奉公贊曹公允並進爵為王丙午令六府
各舉賢良清正之士癸丑柱國許公宇文善有罪免丙
辰大赦三月癸酉皇太后叱奴氏崩帝居倚廬朝夕共
一溢米羣臣表請累旬乃止詔皇太子贊總庶政夏四
月乙卯齊人來吊賙會葬丁巳有星孛於東井五月庚
申葬文宣后於永固陵帝袒跣至陵所辛酉詔曰齊斬
之情經籍彝訓近代沿革遂亡斯禮伏奉遺令既葬便
除攀慕几筵情實未忍三年之喪達於天子古今無易

之道王者之所常行但時有未諧不得全制軍國務重庶有聽朝衰麻之節古廬之禮率遵前典以申罔極百僚以下宜遵遺令公卿上表固請俯就權制過葬即吉帝不許引古誼答之羣臣乃止於是遂申三年之制五服之內亦令依禮初置太子諫議員四人文學十人皇子皇弟友員各二人學士六人戊辰詔故晉公護及諸子並追復先封改葬加謚丙子初斷佛道二教經像悉毀罷沙門道士並令還俗并禁諸淫祀非祀典所載者

盡除之六月丁未集諸軍將教以戰陣之法壬子更鑄
五行大布錢以一當十與布泉錢並行戊午詔立通道
觀凡金科玉篆祕蹟元文並令弘闡秋七月庚申行幸
雲陽宮乙酉衛王直在京反欲突入肅章門司武尉遲
運等拒守直敗遁走戊子車駕至自雲陽宮八月辛卯
禽直於荊州免為庶人冬十月丙申詔御正楊尚希便
於陳庾子詔蒲州人遭飢乏絕者令向郿城以西及荊
州管內就食甲寅行幸蒲州乙卯曲赦蒲州見囚大辟

以下丙辰行幸同州十一月戊午于闐遣使獻名馬已
已大閱於同州城東甲戌車駕至自同州十二月戊子
大會衛官及軍人以上賜錢帛各有差丙申改諸軍軍
人並名侍官癸卯集諸軍講武於臨臯澤涼州比年地
震壞城郭地裂涌泉出

四月春正月戊辰初置營軍器監壬申布寬大之詔多
所蠲免二月丙戌朔日有蝕之辛卯改置宿衛官員已
酉柱國廣德公李意有罪免三月丙辰遣小司寇元衛

使於齊郡縣各省主簿一人甲戌以柱國趙王招為雍
州牧夏四月甲午柱國燕公于實有罪免丁酉初令上
書者並為表於皇太子以下稱啟秋七月己未禁五行
大布錢不得出入關布泉錢聽入而不聽出甲戌陳人
來聘丙子召大將軍以上於大德殿帝親諭以伐齊之
旨言往以政出權宰無所措懷自親覽萬機便圖東討
惡衣菲食繕甲練兵數年以來戰備稍足而偽主昏虐
恣行無道伐暴除亂斯實其時羣臣咸稱善丁丑下詔

暴齊氏過惡以柱國陳王純為前一軍總管榮陽公司馬消難為前二軍總管鄭公達奚震為前三軍總管越王盛為後一軍總管周昌公侯莫陳瓊為後二軍總管趙王招為後三軍總管齊王憲帥衆二萬趣黎陽隋公楊堅廣寧公侯莫陳迥帥舟師三萬自渭入河柱國梁公侯莫陳芮帥衆一萬守太行道申國公李穆帥衆三萬守河陽道常山公于翼帥衆二萬出陳汝壬午上親帥六軍衆六萬直指河陰八月癸卯入齊境禁伐樹殘

苗稼犯者以軍法從事丁未上親帥諸軍攻拔河陰大
城攻子城未尅上有疾九月辛酉夜班師水軍焚舟而
退齊王憲于翼李穆等所在尅捷降拔三十餘城皆棄
而不守唯以王藥城要害令儀同三司韓正守之正尋
以城降齊戊寅至自東伐冬十月戊子初置上柱國上
大將軍官改開府儀同三司為開府儀同大將軍又置
上開府上儀同官閏月以柱國齊王憲蜀公尉遲迥為
上柱國詔諸畿郡各舉賢良十一月己亥改置司內官

員十二月辛亥朔日有蝕之丙子陳人來聘是歲岐寧
二州人飢開倉振恤

五年春正月辛卯行幸河東涑川集闕河東諸軍校獵
甲午還同州丁酉詔分遣大使周省四方察訟聽謠問
民卹隱廢布泉錢戊申初令鑄錢者至絞從者遠配二
月辛酉遣皇太子贊巡撫西土仍討吐谷渾三月壬寅
車駕至自同州文宣皇太后服再朞戊申祥夏六月戊
申朔日有蝕之辛亥享太廟丙辰利州總管紀王康有

罪賜死秋七月乙未京師旱八月戊申皇太子入吐谷
渾至伏俟城而還乙丑陳人來聘九月丁丑大醮於正
武殿以祈東伐冬十月帝復諭羣臣伐齊以去歲屬有
疹疾遂不得尅平逋寇于時出軍河外直為撫背未扼
其喉然晉州本高歡所起統攝要重今往攻之彼必來
援嚴軍以待擊之必尅然後乘破竹之勢鼓行而東足
以窮其窟穴諸將多不願行帝曰機者事之微不可失
矣沮軍事者以軍法裁之己酉帝總戎東伐以越王盛

為右一軍總管杞公亮為右二軍總管隋公楊堅為右
三軍總管譙王儉為左一軍總管大將軍竇泰為左二
軍總管廣化公邱崇為左三軍總管齊王憲陳王純為
前軍癸亥帝至晉州遣齊王憲帥精騎二萬守雀鼠谷
陳王純步騎二萬守千里徑鄭公達奚震步騎一萬守
統軍川大將軍韓明步兵五千守齊子嶺烏氏公尹升
步兵五千守鼓鍾鎮涼城公辛韶步騎五千守蒲津關
柱國趙王招步騎一萬自華谷攻汾州諸城柱國宇文

盛步兵一萬守汾水關遣內史王誼監六軍攻晉州城
帝屯於汾曲齊王憲攻洪洞永安二城並拔之是夜虹
見於晉州城上首向南尾入紫宮帝每日自汾曲赴城
下親督戰庚午齊行臺左丞侯子欽出降壬申齊晉州
刺史崔嵩夜密使送款上開府王軌應之未明登城遂
尅晉州甲戌以上開府梁士彥為晉州刺史以鎮之十
一月己卯齊主自并州帥衆來援帝以其兵新集且避
之乃詔諸軍班師齊主遂圍晉州齊王憲屯諸軍於涑

水為晉州聲援河東地震癸巳至自東伐獻俘于太廟
丙申放齊諸城鎮降民還丁酉帝發京師壬寅度河與
諸軍合十二月戊申次晉州庚戌帝帥諸軍八萬置陣
東西二十餘里乘常御馬從數人巡陣所至輒呼主帥
姓名以慰勉之將士感見知之恩各思自厲將戰有司
請換馬帝曰朕獨乘良馬何所之齊主亦於塹北列陣
申後齊人填塹南引帝大喜勒諸軍擊之齊人便退齊
主與其麾下數十騎走還并州齊衆大潰軍資甲仗數

百里間委棄山積卒亥帝幸晉州仍率諸軍追齊主諸將固請還師帝曰縱敵患生卿等若疑朕將獨往諸將不敢言甲寅齊主遣其丞相高阿那肱守高壁帝麾軍直進那肱望風退散丙辰師次介休齊將韓建業舉城降以為上柱國封郇國公丁巳大軍次并州齊主留其從兄安德王延宗守并州自將輕騎走鄴是日詔齊王公以下示以逆順之道於是齊將帥降者相繼戊午高延宗僭即偽位改年曰德昌己卯軍次并州帝帥諸軍

合戰齊人退帝遂北入城東門諸軍繞城置陣至夜延
宗帥其衆排車而前城中軍却人相蹂踐大為延宗所
敗齊人欲閉門以閹下積尸扉不得闔帝從數騎崎嶇
危險僅得出門至明帥諸軍更戰大破之禽延宗并州
平壬戌詔大赦天下其高緯及王公以下若釋然歸順
咸許自新諸亡人偽朝亦從寬宥官資次序依例無失
齊制偽令即宜削除鄒魯搢紳幽并騎士一介可稱並
宜銓錄丙寅出齊宮中金銀寶器珠玉麗服及宮女二

千人班賜將士以柱國趙王招陳王純越王盛杞公亮
梁公侯莫陳芮庸公王謙北平公寇紹鄭公達奚震並
為上柱國封齊王憲子安城郡公質為河間王諸有功
者封授各有差癸酉帝帥六軍趣鄴

六年春正月乙亥齊主傳位於其太子恒改年曰承光
自號太上皇壬辰帝至鄴癸巳帥諸軍圍之齊人拒守
諸軍奮擊大破之遂平齊齊主先送其母及妻子於青
州及城陷帥數十騎走青州遣大將軍尉遲勤追之是

戰也於陣獲其齊昌王莫多婁敬顯帝數之曰汝有死罪三前從并州走鄴棄母攜妻妾是不孝外為僞主戮力內實通啟於朕是不忠送款之後猶持兩端是不信如此用懷不死何待遂斬之是日西方有聲如雷甲子帝入鄴城詔去年大赦班宣未及之處皆從赦例已亥詔曰晉州大陣至鄴身殞戰場者其子即授父本官尉遲勤禽齊主及其太子恒於青州庚子詔曰僞齊之末姦佞擅權濫罰淫刑動挂羅網偽右丞相咸陽王故斛

律明月偽侍中特進開府故崔季舒等七人或功高獲
罪或直言見誅朕兵以義動翦除凶暴表閭封墓事切
下車宜追贈謚并加窆厝其見在子孫各隨蔭叙錄家
口田宅沒官者並還之辛丑詔偽齊東山南園及三臺
並毀撤瓦木諸物凡入用者盡賜百姓山園之田各還
本主二月丙午論定諸軍勲置酒於齊太極殿會軍士
以上班賜有差丁未齊主至帝降自阼階見以賓主禮
齊任城王潛在冀州擁兵未下遣上柱國齊王憲與柱

國隋公楊堅討平之齊范陽王高紹義叛入突厥齊諸
行臺州鎮悉降關東平合州五十五郡一百六十二縣
三百八十五戶三十萬二千五百二十八口二千萬六
千八百八十六乃於河陽及幽青南充豫徐北朔定州
置總管府相并二總管各置宮及六府官癸丑詔自偽
武平三年以來河南諸州人偽齊破掠為奴婢者不問
公私並放免之其住在淮南者亦即聽還願住淮北者
可隨便安置癰疾孤老不能自存者所在矜恤乙卯車

駕發自鄴三月壬午詔山東諸州各舉士夏四月乙巳至自東伐列齊主於前其王公等並從車輿旌旗及器物以次陳於其後大駕布六軍備凱樂獻俘於太廟京邑觀者皆稱萬歲戊申封齊主為溫國公庚戌大會羣臣及諸蕃客於露寢乙卯廢蒲陝涇寧四州總管己巳享太廟詔分遣使人巡方撫慰觀風省俗五月丁丑以柱國譙王儉為大冢宰庚辰以上柱國杞公亮為大司徒鄭公達奚震為大宗伯梁公侯莫陳芮為大司馬柱

國應公獨孤永業為大司寇鄖公常孝寬為大司空辛巳大醮於正武殿以報功己丑祀方丘詔曰往者冢臣專任制度有違正殿別寢事窮壯麗非直雕牆峻宇深戒前王而締構弘敞有踰清廟不軌不物何以示後兼東夏初平人未見德率先海內宜自朕始其露寢會義崇信含仁雲和思齊諸殿等農隙之時悉可毀撤雕斲之物並賜貧民繕造之物務從卑朴戊戌詔曰京師宮殿已從撤毀并鄴二所華侈過度誠復作之非我豈容

因而弗草諸堂殿壯麗並宜除蕩薨宇雜物分賜窮人
三農之隙別漸營構止蔽風雨務在卑狹庚子陳人來
聘是月青城門無故自崩六月辛亥御正武殿錄囚徒
甲子東巡丁卯詔曰自今不得娶母同姓以為妻妾秋
七月丙戌行幸洛州己丑詔山東諸州舉有才望者赴
行在所共論政事得失八月壬寅議權衡度量頒於天
下其不依新式者悉追停之詔曰以刑止刑以輕代重
罪不及嗣皆有定科雜役之徒獨異常憲一從罪配百

代不免罰既無窮刑何以措凡諸雜戶悉放為百姓配
雜之科因之永削甲子鄭州獻九尾狐皮肉銷盡骨體
猶具帝曰瑞應之來必昭有德若使五品時序四海和
平家識孝慈乃能致此今無其時恐非實錄乃令焚之
九月壬申以柱國鄧公竇熾申公李穆為上柱國戊寅
初令庶人以上非朝祭之服唯得衣綢綿綢絲布圓綾
紗絹綃葛布等九種壬辰詔東土諸州儒生明一經以
上並舉送州郡以禮發遣冬十月戊申行幸鄴宮戊午

改葬德皇帝於冀州帝服總哭於太極殿百官素服哭
是月誅溫公高緯十一月壬申封皇子充為道王允為
蔡王癸酉陳將吳明徹侵呂梁徐州總管梁士彥與戰
不利退守徐州遣上大將軍鄭公王軌討之是月稽胡
反遣齊王憲討平之詔自永熙三年七月以來十月以
前東土人被鈔在化內為奴婢者及平江陵日良人沒
為奴婢者並免同人伍詔曰正位於中有聖通典質又
相草損並不同五帝則四星之象三王制六宮之數劉

曹已降等列彌繁選擇徧於生靈命秩方於庶職椒房
丹地有衆如雲本由嗜欲之情非關風化之義朕運當
澆季思復古始弘贊後庭事從簡約可置妃二人世婦
三人御妻三人自茲以外宜悉減省已亥晦日有蝕之
初行刑書要制持杖羣彊盜一疋以上不持杖羣彊盜
五疋以上監臨主掌自盜二十疋以上小盜及詐請官
物三十疋以上正長隱五戶及十丁以上隱地三頃以
上皆至死刑書所不載者自依律科十二月北營州刺

史高寶寧據州反庚申行幸并州宮移并州軍人四萬戶於關中戊辰廢并州宮及六府是歲吐谷渾百濟並遣使朝貢

宣政元年春正月癸酉吐谷渾偽趙王他婁屯來降壬午行幸鄴宮辛卯幸懷州癸巳幸洛州詔於懷州置宮二月甲辰柱國大冢宰譙王儉薨丁巳車駕至自東巡乙丑以上柱國越王盛為大冢宰陳王純為雍州牧三月戊辰於蒲州置宮廢同州及長春二宮壬申突厥遣

使朝貢甲戌初服常冠以皂紗為之加簪而不施纓導其制若今之折角巾也上大將軍王軌破陳師於呂梁禽其將吳明徹等俘斬三萬餘人丁亥詔柱國豆盧寧征江南武陵南平等郡所有士庶為人奴婢者悉依江陵放免壬辰改元夏四月壬子初令遭父母喪者聽終制庚申突厥入寇幽州五月己丑帝總戎北伐遣柱國原公姬願東平公宇文神舉等五道俱入發關中公私馬驢悉從軍癸巳帝不豫止於雲陽宮丙申詔停諸軍

六月丁酉帝疾甚還宮其夜崩于乘輿時年三十六遺詔王公以下爰及庶寮輔導太子及喪事資用須使儉而合禮隨吉即葬葬訖公除四方士庶各三日哭妃嬪無子者悉放還家羣臣上尊謚曰武皇帝廟稱高祖已未葬於孝陵帝沈毅有智謀初以晉公護專權常自晦迹人莫測其深淺及誅護之後始親萬機尅已厲精聽覽不怠用法嚴整多所罪殺號令懇惻唯屬意於政群下畏服莫不肅然性既明察少於恩惠凡布懷立行皆

欲踰越古人身衣布袍寢布被無金寶之飾諸宮殿華綺者皆徹毀之改為土階數尺不施櫨栱其雕文刻鏤錦繡纂組一皆禁斷後宮嬪御不過十餘人勞謙接下自彊不息以海內未康銳情教習至於校兵閱武步行山谷履涉勤苦皆人所不堪平齊之役見軍士有跣行者帝親脫靴以賜之每宴會將士必自執盃勸酒或手付賜物至於征伐之處躬在行陣性又果決能斷大事故能得士卒死力以弱制彊破齊之後遂欲窮兵極武

平突厥定江南一二年間必使天下一統此其志也

武帝保定五年天和六年建德六年宣政元年即

位十八年

宣皇帝諱贇字乾伯武帝長子也母曰李太后武成元年生於同州保定元年五月丙午封魯國公建德元年四月癸巳武帝親告廟冠於阼階立為皇太子二年詔皇太子巡撫西土文宣后崩武帝諒闇詔太子總朝政五旬而罷武帝每巡幸四方太子常留監國五年二月

又詔太子巡西土因討吐谷渾宣政元年六月丁酉武帝崩戊戌太子即皇帝位尊皇后曰皇太后甲子誅上柱國齊王憲閏月乙亥詔山東流人新復業及突厥侵掠家口破亡不能存濟者給復一年立妃楊氏為皇后辛巳以上柱國趙王招為太師陳王純為太傅柱國代王達滕王迺盧公尉遲運薛公長孫覽並為上柱國是月幽州盧昌期據范陽反詔柱國東平公宇文神舉討平之秋七月乙巳享太廟丙午祀圓丘戊申祀方澤庚

戌以小宗伯岐公斛斯徵為大宗伯壬戌以南兗州總
管隋公楊堅為上柱國大司馬癸亥尊所生李氏為帝
太后八月丙寅夕月於西郊長安萬年二縣人居京城
者給復三年壬申幸同州遣大使巡察諸州制九條宣
下州郡其母族絕服外者聽婚以上柱國薛公長孫覽
為大司徒柱國楊公王誼為大司空丙戌以柱國永昌
公椿為大司寇九月丁酉以柱國宇文盛張掖公王傑
杞罕公辛威鄖國公常孝寬並為上柱國庚戌封皇弟

元為荊王詔諸應拜者皆以三拜成禮冬十月癸酉至
自同州戊子百濟遣使朝貢十一月己亥講武於道會
苑帝親擐甲冑是月突厥犯邊圍酒泉殺掠吏士十二
月甲子以柱國畢王賢為大司空己丑以上柱國河陽
總管滕王道為行軍元帥伐陳免京師見徒並令從軍
大象元年春正月己丑受朝於露門帝服通天冠絳紗
袍羣臣皆服漢魏衣冠大赦改元為大成初置四輔官
以大象宰越王盛為大前疑蜀公尉遲迴為大右弼申

公李穆為大左輔大司馬隋公楊堅為大後丞癸卯封
皇子衍為魯王甲辰東巡丙午以柱國常山公于翼為
大司徒辛亥以柱國許公宇文善為大宗伯戊午行幸
洛陽立魯王衍為皇太子二月癸亥詔曰河洛之地書
稱朝市自魏氏失馭城闕為墟我太祖受命艷鎬有懷
光宅高祖往巡東夏布政此宮朕以眇身祗承寶運雖
庶幾聿修之志敢忘燕翼之心一昨駐蹕金墉備嘗遊
覽百王制度基址尚存今若因修為功易立宜命邦事

修復舊都奢儉取文質之間功役依子來之義北瞻河
內咫尺非遙前詔經營今宜停罷於是發山東諸州兵
增一月功為四十五日役起洛陽宮常役四萬人以迄
晏駕并移相州六府於洛陽稱東京六府殺柱國徐州
總管鄭公王軌停南討諸軍以趙王招女為千金公主
嫁於突厥乙亥行幸鄴丙子初令總管刺史行兵者加
持節餘悉罷之辛巳詔傳位於皇太子衍大赦改元大
成為大象帝於是自稱天元皇帝所居稱天臺冕二十

有四旒車服旗鼓皆以二十四為節內史御正皆置上大
大夫皇帝行稱正陽宮置納言御正諸衛等官皆準天
臺尊皇太后為天元皇太后癸未日出將入時其中並
有烏色太如雞卵經四日乃滅戊子以大前疑越王盛
為太傅大右弼蜀公尉遲迴為大前疑代王達為大右
弼辛卯詔徙鄴城石經於洛陽又詔洛陽凡是元遷戶
並聽還洛州此外欲住者聽之河陽幽相豫毫青徐七
總管受東京六府處分三月庚申車駕至自東巡大陳

軍伍親探甲冑入自青門皇帝衍備法駕從百官迎於青門外是時驟雨儀衛失容辛酉封趙王招第二子貫為永康縣王夏四月壬戌朔有司奏言日蝕不視事過時不蝕乃臨軒立妃朱氏為天元帝后癸亥以柱國畢王賢為上柱國己巳享太廟壬午大醮於正武殿五月辛亥以潞州襄國郡為趙國齊州濟南郡為陳國豐州武當安富二郡為越國潞州上黨郡為代國荊州新野郡為滕國邑各一萬戶令趙王招陳王純越王盛代王

達滕王道並之國是月遣使簡視京城及諸州士庶女
充選後宮突厥寇并州六月咸陽有池水變為血徵山
東諸州人修長城秋七月庚寅以大司空畢王賢為雍
州牧大後丞隋公楊堅為大前疑柱國滎陽公司馬消
難為大後丞丙申納大後丞司馬消難女為正陽宮皇
后己酉尊帝太后李氏為天皇后壬子改天元帝后
朱氏為天皇后立妃元氏為天右皇后妃陳氏為天左
皇后八月庚申幸同州壬申還宮甲戌以天左皇后父

大將軍陳山提天右皇后父開府元晟並為上柱國初武帝作刑書要制用法嚴重及帝即位恐物情未附除之至是為刑經聖制其法深刻大醜於正武殿告天而行焉壬午以上柱國雍州牧畢王賢為太師上柱國郇公韓建業為大左輔是月所在螳羣鬪各四五尺死者十八九九月己卯以鄴王貞為大冢宰上柱國郇公常孝寬為行軍元帥率行軍總管杞公亮郕公梁士彥伐陳遣御正杜果使於陳冬十月壬戌幸道會苑大醜以

高祖武皇帝配醮初復佛象及天尊象帝與二象俱南
坐大陳雜戲令京城士庶縱觀是月相州人段德舉謀
反伏誅十一月乙未夜行幸同州壬寅還宮乙巳初鑄
永通萬國錢以一當千與五行大布並行是月常孝寬
拔壽陽杞國公亮拔黃城梁士彥拔廣陵陳人退走於
是江北盡平十二月戊午以災異屢見帝御路寢見百
官下詔罪已將避正寢減膳徹懸於是舍仗衛往天興
宮百官上表勸復寢膳許之甲子還宮御正武殿集百

官及宮人內外命婦大列妓樂又縱胡人乞寒用水澆沃以爲戲樂乙丑行幸洛陽帝親御驛馬日行三百里四皇后及文武侍衛數百人並乘驛以從令四后方駕齊驅或有先後便加譴責人馬頓仆相屬於道己卯還宮

二年春正月丁亥帝受朝于道會苑癸巳享太廟乙巳造二宸畫日月象以置左右戊申雨雪雪上又雨細黃土移時乃息己卯詔江右諸州新附人給復二十年初

稅入市者人一錢二月丁巳帝幸露門學行釋奠禮戊
午突厥遣使獻方物且逆千金公主乙丑改制詔為天
制勅為天勅尊天元皇太后為天元上皇太后天皇太
后李氏曰天元聖皇太后癸未立天元皇后楊氏為天
元太皇后天皇后朱氏為天大皇后天右皇后元氏為
天右太皇后天左皇后陳氏為天左太皇后正陽宮皇
后直稱皇后是月洛陽有禿鶖鳥集新太極殿前榮州
有黑龍見與赤龍鬪於汴水側黑龍死三月丁亥賜百

官及百姓大酺詔進封孔子為鄒國公邑數準舊并立
後承襲別於京師置廟以時祭享戊子行軍總管杞公
亮舉兵反行軍元帥常孝寬獲而殺之辛卯行幸同州
增候正前驅式道為三百六十重自應門至赤岍澤數
十里間幡旗相蔽鼓樂俱作又令虎賁持鉞馬上稱警
蹕以至同州乙未改同州宮為天成宮庚子車駕至自
同州詔天臺侍衛皆着五色及紅紫綠衣以雜色緣名
曰品色衣有大事與公服間服之壬寅詔內外命婦皆

執笏其拜宗廟及天臺皆俛伏甲辰初置天中大皇后
立天左大皇后陳氏為天中大皇后立妃尉遲氏為天
左大皇后夏四月己巳享太廟己卯以旱故降見囚死
罪以下壬午幸中山祈雨至咸陽宮雨降甲申還宮令
京城士女於衢巷作音樂以迎候五月甲午帝備法駕
幸天興宮乙未帝不豫還宮詔揚州總管隋公楊堅入
侍疾丁未追趙越陳代滕五王入朝己酉大漸御正下
大夫劉昉與內史上大夫鄭譯矯制以隋公楊堅受遺

輔政是日帝崩於天德殿時年二十二謚宣皇帝七月丙申葬定陵帝之在東宮也武帝慮其不堪承嗣遇之甚嚴朝見進止與諸臣無異雖隆寒盛暑亦不得休息性嗜酒武帝遂禁醪醴不許至東宮帝每有過輒加捶扑嘗謂之曰古來太子被廢者幾人餘兒豈不堪立邪於是遣東宮官屬錄帝言語動作每月奏聞帝懼威嚴矯情修飾以是惡不外聞嗣位之初方逞其欲大行在殯曾無戚容即通亂先帝宮人纔踰年便恣聲樂采擇

天下子女以充後宮好自矜夸飾非拒諫禪位之後彌復驕奢耽酗於後宮或旬日不出公卿近臣請事者皆附闥官奏之所居宮殿帷帳皆飾以金玉珠寶光華炫耀極麗窮奢及營洛陽宮雖未成畢其規摹壯麗踰於漢魏遠矣唯自尊崇無所顧憚國典朝儀率情變改後宮位號莫能詳錄每對臣下自稱為天以五色土塗所御天德殿各隨方色又於後宮與皇后等列坐用宗廟禮器罇彝珪璣之屬以次食焉又令羣臣朝天臺者致

齋三日清身一日車旗章服倍於前王之數既自比上帝不欲令人同已常自帶綬及冠通天冠加金附蟬顧見侍臣武弁上有金蟬及王公有綬者並令去之又聽人有高者大者之稱諸姓高者改為姜九族稱高祖者為長祖曾為次長祖官稱名位凡謂上及大者改為長有天者亦改之又令天下車皆渾成為輪禁天下婦人皆不得施粉黛唯宮人得乘有輜車加粉黛焉西陽公溫杞公亮之子即帝從祖兄其妻尉遲氏有容色因

入朝帝遂飲以酒逼而媼之亮聞之懼謀反纔誅溫卽
追尉遲氏入宮初為妃尋立為皇后每左右侍臣論議
唯欲興造草易未嘗言及政事其後遊戲無常出入不
節羽儀伏衛晨出夜還或幸天興宮或遊道會苑陪侍
之官皆不堪命散樂雜戲魚龍爛漫之伎常在目前好
令京城少年為婦人服飾入殿歌舞與後宮觀之以為
喜樂擯斥近臣多所猜怨又吝於財略無賜與恐羣臣
規諫不得行已之志常遣左右密伺察之動止所為莫

不抄錄小有乖違輒加其罪自公卿以下皆被楚撻其間誅戮黜免者不可勝言每捶人皆以百二十為度名曰天杖宮人內職亦如之后妃嬪御雖被寵嬖亦多被杖背於是內外恐懼民不自安皆求苟免莫有固志重足累息以逮於終矣

宣帝大象二年即大成元年改大象

靜皇帝諱衍後改名闡宣帝之長子也母曰朱皇后建德二年六月生于東宮大象元年正月癸卯封魯王戊

午立為皇太子二月辛巳宣帝於鄴宮傳位授帝居正陽宮

二年五月乙未宣帝寢疾詔帝入宿露門學巳酉宣帝崩帝入居天臺廢正陽宮大赦停洛陽宮作庚戌上天元上皇太后尊號為太皇太后天元聖皇太后李氏為大帝太后天元大皇后為皇太后天大皇后朱氏為帝太后其天中大皇后陳氏天右大皇后元氏天左大皇后尉遲氏並出俗為尼以柱國漢王贊為上柱國右大

丞相上柱國揚州總管隋公楊堅為假黃鉞左大丞相
柱國秦王贇為上柱國帝居諒闇百官總已以聽於左
大丞相壬子以上柱國鄖公常孝寬為相州總管罷入
市稅錢六月戊午以柱國許公宇文善神武公竇毅修
武公侯莫陳瓊大安公閻慶並為上柱國趙王招陳王
純越王盛代王達滕王迺來朝庚申復佛道二教辛酉
以柱國杞公贊燕公于實郛公賀拔伏恩並為上柱國
甲子相州總管尉遲迴舉兵不受代詔發關中兵即以

常孝寬為行軍元帥討之柱國畢王賢以謀執政被誅
以上柱國秦王贇為大冢宰杞公椿為大司徒己巳詔
南定北光衡巴四州人為宇文亮抑為奴婢者並免之
甲戌有赤氣起西方漸東行徧天庚辰罷諸魚池及山
澤公禁者與百姓共之以柱國蔣公梁睿為益州總管
秋七月甲申突厥送齊范陽王高紹義庚寅申州刺史
李惠起兵庚子詔趙陳越代滕五王入朝不趨劔履上
殿榮州刺史邵公宇文胄舉兵遣大將軍楊素討之青

州總管尉遲綱舉兵丁未隋公楊堅都督內外諸軍事
己酉鄆州總管司馬消難舉兵以柱國楊公王誼為行
軍元帥討之壬子趙王招越王盛以謀執政被誅癸丑
封皇弟衍為萊王術為郢王是月豫州襄州諸蠻各帥
種落反八月庚申益州總管王謙舉兵不受代即以梁
睿為行軍元帥討之庚午常孝寬破尉遲迴於鄴迴自
殺相州平移相州於安陽其鄴城及邑毀廢之丙子以
漢王贊為太師以上柱國并州總管申公李穆為太傅

以宋王實為大前疑以秦王贄為大右弼以燕公于實
為大左輔己卯以尉遲迥平大赦庚辰司馬消難擁眾
以魯山甌山二鎮奔陳遣大將軍元景山追擊之鄖州
平沙州氏帥開府楊永安聚眾反應王謙遣大將軍達
奚儒討之楊素破宇文冑於滎陽斬之以上柱國神武
公竇毅為大司馬以齊公于智為大司空廢相青荊金
晉梁州六總管九月丙戌廢河陽總管為鎮隸洛州以
小宗伯竟陵公楊慧為大宗伯壬辰廢皇后司馬氏為

庶人戊戌以柱國楊公王誼為上柱國庚戌以柱國常
山公于翼化政公宇文忻並為上柱國壬子丞相去左
右號隋公楊堅為大丞相冬十月甲寅日有蝕之壬戌
陳王純以怨執政被誅大丞相隋公楊堅加大冢宰五
府總於天官戊寅梁睿破王謙斬之傳首京師益州平
十一月甲辰達奚儒破楊永安沙州平丁未上柱國鄖
公常孝寬薨十二月壬子以柱國蔣公梁睿為上柱國
丁巳以柱國邠公楊雄普安公賀蘭謩郕公梁士彥上

大將軍新寧公叱列長义武鄉公崔弘度大將軍中山
公宇文恩濮陽公宇文述渭原公和干子任城公王景
漁陽公楊銳上開府廣宗公李崇隴西公李詢並為上
柱國庚申以柱國楚公豆盧勣為上柱國癸亥詔曰太
祖受命龍德猶潛三分天下志扶魏室多所改作冀允
上元文武羣官賜姓者衆本殊國邑實乖胙土不歆非
類異骨肉而共烝嘗不愛其親嗟行路而叙昭穆且神
徵革姓本為歷數有歸天命在人推讓終而弗獲故君

臨區字累世於茲可不仍遵謙挹之旨久行權宜之制
諸改姓者悉宜復舊甲子大丞相隋公楊堅進爵為王
以郡為隋國己巳以柱國沛公鄭譯為上柱國辛未代
王達滕王逌並以謀執政被誅壬申以大將軍長寧公
楊勇為上柱國大司馬以小冢宰始平公元孝矩為大
司寇

大定元年春正月壬午改元丙戌詔戎秩上開府以上
職事下大夫以上外官刺史以上各舉賢良二月甲子

帝遜位于隋居于別宮隋氏奉帝為介國公邑萬戶車服禮樂一如周制上書不稱表答表不稱詔有其文事竟不行隋開皇元年五月壬申帝崩時年九歲隋志也

謚曰靜皇帝葬恭陵

靜帝大定元年

右後周五主二十五年禪于隋

東魏孝靜帝天平四年天象元年興和四年武定
八年即位十七年

右東魏一帝十七年而禪位于齊按後魏正史
自孝武帝後便列孝靜帝紀乃云宇文氏害孝
武以南陽王寶炬為僭稱尊號

通志卷十七